


# ANG PAGPANAG-IYA SA MGA GANGHAAN SA KAAWAY

 Maayong buntag, sa tanan. Ug malipayon ako nga makabalik pag-usab niining buntaga sa tabernakulo, aron maiampo ang mga tawong masakiton karong adlaw. Kini, sa kasagaran, ginapaningkamotan nato nga moanhi, sa kanunay, ug—ug iampo ang mga tawo nga nanganhi gikan pa sa nagkalainlaing mga lugar, nga nanginahanglan og pag-ampo.

Ug karon duol na gayud kami nga manglakaw, karon, para sa mga panagtigum didto sa California ug West Coast. Ug nagahangyo gayud kami sa inyong mga pag-ampo, nga ang Dios sa Langit magmaloloy-on kanamo didto ug hatagan kami og maayo kaayong mga panerbisyo.

Bag-ohay lang ako miabot, kagahapon, o sa miaging gabii, diay, nga nagabhian. Ug kagahapon mao'y usa sa... Bueno, niadtong usa ka adlaw, ug kagahapon, mao'y usa sa makahuloganon nga mga adlaw sa akong kinabuhi. Didto, nahibalo ako nga labing menos duha ka tawo, o tulo, ang nakasaksi sa pagkunsad sa Ginoo didto sulod sa bilding, kagahapon. Ug pagkadaku, makahibulongan nga butang ang nahitabo, nga wala lang ko og higayon karong buntaga nga isulti kaninyo. Apan basin sa sunod nga Dominggo sa buntag na lang, sa dili pa kami molakaw, tingali magkaaduna ako og higayon, panahon sa pag-Mensahe, nga—nga isulti kaninyo. Kon itugot sa Ginoo, moanhi ako, aron iampo man lang ang mga masakiton, sa Dominggo sa buntag. Gusto unta namo manglakaw nga mga udto na, kung mahimo, para sa panagtigum sa San Jose didto sa San Jose, California. Ug kung aduna kamo mga kaila, didto sa West Coast...Nga ginatoohan natong mahimong mao na tingali ang takna nga akong ginapaabot, sa dugay na, ang umaabot nga kabag-ohan sa akong ministerio. Ug haduol na kaayo kini, nga abi ko og mahitabo na kini kagahapon. Ug nagatoo ko nga mahitabo na gayud kini karon, ug mamahimo kining labaw pa kay sa bisan unsang butang nga atong nakita sukad o nadungog, hangtud sa karon. Karon, hinumdumi ninyo, kana ang MAO KINI ANG GINAINGON SA GINOO. Kita n'yo? Ug busa nagapaabot gayud kita niini, sa unsa mang takna.

Ug magkaaduna kita og panagtigum didto sa fair grounds. Nagtoo ko nga husto kana, dili ba, Gene? Sa fair grounds didto sa San Jose, California. Ug usa kini ka napulo-ka-adlaw nga panagtigum, magsugod sa ika-20, hangtud sa ika-29, didto sa—

sa San Jose. Karon, hinumdumi gayud kami ug mag-ampo alang kanamo.

Karon aduna kita'y mga, kung untop lang unta kita sa oras makapanggawas, mga usa ug tunga sa oras gikan karon, nga masugdan nato ang atong mga panerbisyo alang sa pagpang-ampo sa mga masakiton ug mahatud ang Pulong. Napili ko, niining buntaga, ang gamay'ng bahin sa Kasulatan, duha ka bahin diha sa Biblia, aron pagahisgotan.

Apan sa dili pa kita maghisgot, iduko nato ang atong mga ulo sa kadali lang, alang sa pag-ampo.

<sup>2</sup> Labing maloloy-on nga Dios, mapainubsanon kami nga nagaduol sa Imong trono sa grasya niining buntaga, ingon nga dili takus nga mga anak, apan nagaduol uban sa wala'y-sagol nga pagtoo diha sa Dios, nga gikahatag kanamo pinaagi sa Balaang Espiritu, ug sa Iyang makanunayon nga Presensiya nga nagauban kanamo. Ug pinaagi sa saad ni Ginoong Jesus, nga kung mapainubsanon lang kami nga moduol ug magapangayo sa bisan unsa sa Iyang Ngalan, igatugot kanamo ang among ginahangyo. Busa, wala kami nagatan-aw kung kami ba'y takus, tungod kay wala gayud kami og bisan unsa man nga katakus, kondili nagatan-aw kami ngadto sa katakus sa Kalbaryo, kon diin ang grasya gihatag nga wala'y bayad nganhi kanamo pinaagi sa Anak sa Dios. Ug dili gayud namo halos mapugngan ang mga luha nga magadagayday ngadto bisan sa among mga tutunlan, pagmahunahunaan namo nga kami, mga tawong dili-takus, ug kung unsa nga tungod sa Iyang grasya didto sa Kalbaryo gibuhat Niya kadto alang kanamo, aron nga mapahiduol Niya gayud kami ngadto sa Dios, bisan ngadto sa pagkaaduna og relasyon Kaniya. Ug karon mga anak na kita nga lalaki ug mga anak nga babaye Niya.

<sup>3</sup> Ug mianhi kami niining buntaga, Ginoo, sa silong niining gamay nga atop, aron sa paghalad sa among mga kaugalingon, ug para sa panerbisyo, sa pagsugid sa among mga sala, ug—ug sa Balaan nga pagsimba. Nagalaum kami nga Ikaw makauban namo ug hatagan kami og espirituhanong panabut mahitungod sa Imong haduol na nga pag-abot, aron nga mahiandam namo ang among mga kasingkasing sa matag adlaw alang nianang dakung panghitabo nga ginapaabot sulod sa linibo na ka mga tuig. Sa pagkatinuod ang tibuok kinaiyahan nagaagulo, nagatuaw aron nga makahilwas. Ug ang among mga espiritu sa sulod namo, Ginoo, sa kanunay nagasugid, nga, “Mga magpapanaw ug mga lumalangyaw kita, ug dili nato kini pinuy-anan, apan kita nagapangita sa usa ka Lungsod Kinsang Magtutukod ug Magbubuhat mao ang Dios.” Kami nagapaabot alang nianang dakung panahon nga umaabot.

<sup>4</sup> Ginoo, magmahunahunaon kami nga kining mga panagtigum, sa diha nga nagakatigum kami dinhi, nagaampo

kami alang sa Imong mga anak nga masakiton ug nag-antus. Ug among ginapangamuyo nga Imo kaming tagbuon karong adlaw diha sa usa ka pinasahi gayud nga paagi, aron sa pagayo sa tanang mga sakit ug mga balatian sa among taliwala. Ug mahitabo unta, Ginoo, kini nga saad nga akong gihisgotan sa mga nangagi, uban sa pakighinagbo Kanimo kagahapon didto, niadtong pagsubang gayud sa adlaw, ug kung unsa nga Imo kining gibalik-balik nga gipamatud-an. Ug mabati namo nga ang takna haduol na kaayo. Ug hinaut nga kini mao ang adlaw, Ginoo, nga mahitabo kini, nga Imong bag-ohon ang ministerio, Ginoo, ngadto sa usa ka mamahimong mas maloloy-on para sa Imong katawhan.

<sup>5</sup> Ug karon, Amahang, Dios, dili kami magaampo nga alang lamang sa mga ania dinhi, kondili alang usab niadtong mga pagaabton niini sa tibuok kalibutan, nga mga nanginahanglan, sa espirituhanon man ug sa pisikal. Ihatag ngadto kanila, Oh Ginoo, ang mga tinguha sa ilang mga kasingkasing, tungod kay ang Imong mga anak nakigbisog man niining mga adlaw. Ang pagpanglupig sa kaaway nagkakusog kaayo, apan Ikaw ang mas kusgan. Kay nahisulat man kini, “Siya nga anaa kaninyo labaw pa kay kaniya nga anaa sa kalibutan.” Pinaagi niini kami nagmadaugon. Magpakigsulti Ka kanamo pinaagi sa Imong sinulat nga Pulong. Ug sa dihang mobiya na kami niining buntaga, hinaut nga kami makaingon sama niadtong mga nanagpanlakaw gikan sa Emmaus, “Dili ba ang atong mga kasingkasing nagdilaab man sa sulod nato samtang nakigsulti Siya kanato diha sa dalan?” Among ginapangamuyo kini sa Ngalan ni Jesus, Nga mao ang nagsaad. Amen.

<sup>6</sup> Nagabasa ako karon gikan sa duha ka mga bahin diha sa Basahon sa Genesis. Ang usa niini makita sa ika-24 nga kapitulo, sugod sa ika-56 nga bersekulo, mabasa nga ingon niini.

*Ug siya miingon kanila, Ayaw kamo pagpugong kanako, kay nagatan-aw kamo nga ang GINOO nagapanalangin sa akong panaw; papaulia na ako aron moadto ako sa akong agalon.*

*Ug sila mingtubag, Tawgon nato ang dalaga, ug atong pangutan-on siya.*

*Ug gitawag nila si Rebekah, ug sila ming-ingon kaniya, Mouban ka ba niining tawhana? Ug siya mitubag, Oo mouban ako.*

*Ug gitugotan nila sa pagpalakaw si Rebekah uban sa iyang igso- . . . nga igsoon nila nga babaye, ug ang iyang iwa, ug ang sulogoon ni Abraham, . . .*

*Ug gipanalanginan nila si Rebekah, ug sila miingon kaniya, Igsoon namo, mainahan ka unta sa linibolibo, ug ang imong kaliwatan makapanag-iya sa pultahan niadtong nanagdumot kanila.*

7 Ug sa Genesis 22, sa ika-15 nga bersekulo, atong mabasa.

*Ug ang manolunda sa GINOO nagtawag kang Abraham sa ikaduha gikan sa langit,*

*Ug miingon, Tungod sa akong kaugalingon nanumpa ko, nagaingon ang GINOO, nga tungod kay gibuhat mo kini, wala ka gayud magdu- . . . magdumili kanako sa imong anak, sa imong bugtong anak:*

*Sa pagpanalangin ikaw pagapanalanginan ko, ug sa pagpadaghan pagapadaghanon ko ang imong kaliwatan ingon sa mga bitoon sa . . . langit, ug ingon sa balas . . . nga atua sa baybayon sa dagat; ug ang imong kaliwatan manag-iyang sa mga ganghaan sa iyang kaaway;*

*Ug diha sa imong kaliwat mapanalanginan ang tanan nga mga nasud sa yuta; kay gituman mo man ang akong tingog.*

8 Hinaut nga idugang karon sa Ginoo ang Iyang mga panalangin sa pagbasa sa Iyang mga Pulong. Karon gusto kong pagahisgotan, kung kini man matawag nga usa ka teksto, ang akong hilisgotan niining buntaga, una, mao’y, “Pagsulay sa atubangan sa gisaad nga mga ganghaan.” Ug ang hilisgotan mao ang: *Ang Pagpanag-iyang Sa Mga Ganghaan Sa Kaaway.*

9 Dugay nang ginasulayan sa Dios ang maong patriarca, tungod kay Iyang gikahatag kaniya ang usa ka saad. Ug sa diha nga nagasaad ang Dios, gusto Niya nga makasigurado nga kini nga tawo takus sa mao nga saad, sa diha nga dili pa Niya pagatumanon kung unsay Iyang giingon o sa kung unsa ang Iyang gisaad. Busa gisaaran si Abraham kaniadto nga pinaagi sa iyang kaliwat mahimong mapanalanginan ang tibuok kalibutan, nga magkaaduna siya og usa ka anak nga lalaki. Ug, sa niining anak nga lalaki, gikan kaniya kinahanglan motungha ang usa ka Kaliwat nga mao’y mopanalangin sa tibuok yuta. Ug si Abraham, sa diha nga gihatag ngadto kaniya ang saad, setentay-singko na ang panuigon; ug si Sarah, nga iyang asawa, saysentay-singko na ang panuigon. Apan nagaingon ang Biblia kanato nga si Abraham wala nagduhaduha sa saad sa Dios, sa kakulang sa pagtoo, kondili malig-on, nga nagahatag og pagdayeg ngadto sa Dios. Ug ang Dios, sa matag higayon, nagsulay kaniya, apan miabot gayud siya niadtong pang-katapusan nga pagsulay sa wala pa mahitabo ang maong panalangin.

10 Ug ingon niana usab kini ngadto sa tanan nga Kaliwatan ni Abraham. Nagahatag kanato ang Dios og nianang pang-katapusan nga pagsulay sa diha nga wala pa Niya ginahatag ang saad. Ug kung mahimo pa, gusto ko unta nga mosulti og usa ka butang dinhi, sa akong kaugalingon, apan magdumili ako niana. Sa nianang pang-katapusan nga pagsulay, makita kon unsaon ninyo paglihok tubag niini. Ug sa dihang gisulayan Niya niini

si Abraham, nakaplagaan Niya si Abraham nga matinud-anon gayud sama sa kung unsa siya kanhi sa dihang nagsugod pa lang siya. Pagkamaanindot gayud nga panalangin kini niining buntaga kung kita nga nagatoo sa Iyang saad sa pagpang-ayo nga mobarug lamang nga matinud-anon gayud sama sa gibuhat nato kaniadto sa diha nga mibarug kita dinhi ug gidawat kini. Bisan unsa pa ang ingnon sa doktor, magpabilin lamang nga matinud-anon gayud.

<sup>11</sup> Ug sa dihang gibuhat niya kini kaniadto, ug wala gayud magdumili sa iyang bugtong anak, kondili andam na nga idunggab ang punyal ngadto sa dughan ni Isaac, aron sa pagguba sa iyang testimonyo. Nagpamatuod siya, sa tibuk kayutaan nga nasinati na niya, nga magkaaduna siya niining anak nga lalaki. Ug unya sa dihang miabot na ang maong anak nga lalaki, gisugo siya aron bakwion, ug aron gubaon ang bugtong paglaum nga nagkaaduna siya aron nga matuman ang iyang testimonyo. Ug sa dihang nakita sa Dios nga matinuuron siya sa niana nga pagtoo nga aduna siya diha sa Dios, milantaw ang Dios gikan sa kalangitan ug miingon Siya, “Nanumpa Ako sa Akong Kaugalington nga pagapanalanginan Ko ikaw ug pagapadaghanon ikaw, ug ang imong kaliwatan manag-iya sa ganghaan sa iyang mga kaaway.” Pagkamaanindot nga saad!

<sup>12</sup> Ug si Rebekah, nga mao’y mamahimong inahan niining inila, gisaad, gipaabot nga anak nga lalaki, sa dihang gitawag usab siya ngadto sa pang-katapusan nga pagsulay, mahitungod sa usa ka estranyo nga lalaki nga wala pa niya sukad nakita sa una. Ang nakita lamang niya mao ang pagpamuhat sa Balaang Espiritu. Ug sa diha nga ang iyang mga ginikanan dili bug-os nga makagdesisyon kon mouban ba siya niining estranyo o dili, aron nga mamahimong asawa sa usa ka lalaki nga wala pa gayud niya nakita sukad, gidala siya ngadto sa pang-katapusan nga pagsulay. “Kuhaon nato ang dalaga ug pasultia siya. Atong madungog gikan sa iyang baba kon mouban ba siya, kon oo ba o dili.”

<sup>13</sup> Ingon niana usab kini ngadto sa tanang Kaliwat sa Dios. Kinahanglan nga magagikan kini sa imong baba. Gusto sa Dios nga makadungog gikan kanimo.

<sup>14</sup> Busa sa dihang gisulayan siya kaniadto, wala gayud siya nagduhaduha ni sa usa ka minuto. Miingon siya, “Mouban ako.” Gusto ko kana. Dili nga, “Pahunahunaa usâ ninyo ako. Tugoti nga tun-an ko kini.” Bug-os siya nga masaligon. Ingon niana nga mga tawo ang mahimong gamiton sa Dios, sa dihang bug-os kamong nagasalig nga pagatumanon gayud sa Dios ang Iyang saad. Miingon, “Mouban ako.”

<sup>15</sup> Ug ang iyang mga kabanay kaniadto, dinihogan gayud, nga tingali wala sila mahibalo niini, apan nanagpropesiya sila samtang ginapandungan nila sa ilang mga kamot ang ilang

igsoong babaye, ug ilang anak nga babaye; kining maanyag, batan-ong dalagang Judio, samtang gipasakay nila siya diha sa kamelyo ug gipaadto siya sa yuta nga dili ilang lugar, taliwala sa disinati nga mga tawo. Apan aduna gayu'y Sa Kung Unsang Butang diha kanila kaniadto. Nanag-ingon sila, "Ang imong kaliwatan makapanag-iya sa ganghaan sa ilang kaaway. Mainahan ka unta sa linibolibo."

<sup>16</sup> Ug, sa karon, kana nga kaliwat sa mga tawo ug ang katawhan sa Dios nagkuyanap gikan sa usa ka dagat ngadto sa ubang dagat, sa tibuok kalibutan. Sa nianang moabot nga pagkabanhaw mamahimo silang sama sa mga bitoon sa Langit, ingon nga silang masigahon nga mga suga nagapuwesto na diha sa angay nilang kahimutangan, sa diha nga nagalagbas sila ngadto sa kalangitan. Ug pagmobalik na sila, mamahimo silang sama sa mga kadagatan diha sa . . . o mga balas sa baybayon. Mamahimo silang linibo ka minilyon.

<sup>17</sup> "Ang imong kaliwatan manag-iya sa ganghaan sa iyang kaaway." Mao kana ang gipanumpaang nga saad sa Dios, "Ang kaliwatan ni Abraham."

Kung ingon niana, pinaagi sa Iyang Balaang Espiritu, ingon nga nakita nga ang inahan kabahin sa maong anak nga lalaki, usab, tungod kay kabahin man sila sa unod. Dayon, ang Balaang Espiritu nga nagalihok sa niadtong mga tawo, miingon, "Siya . . . Tugoti nga ang imong Kaliwatan makapanag-iya sa ganghaan sa kaaway." Kung ingon-ana, ang Dios nga nagapanumpa nga pagapanag-iyahon Niya ang ganghaan sa kaaway, nan sa unsa mang pagkabutang ginapahiluna niana ang Iglesia sa buhi nga Dios?

<sup>18</sup> Mga Kaliwat kita ni Abraham. Tungod kay, kita, ingon nga mga patay na diha kang Cristo, kita, nahimong mga Kaliwat ni Abraham ug mga manununod uban kaniya, ilalum sa mao rang gipanumpaang nga saad. Mga Kaliwat kita ni Abraham, ug mga manununod gayud sa matag saad nga gikahatag diha kaniya kaniadto. Apan sa diha nga nagaabot na ang mga pagsulay, dinha kita nagakapakyas. Apan wala ako nagatoo nga mapakyas ang matuod nga Kaliwat ni Abraham. Mobarug sila sa ingon ka maisug ug matinuuron sama sa gibuhay ni Abraham.

<sup>19</sup> Karon atong makita nga ang Dios dili mahimong mosulti og bisan unsa o—o mohimo og bisan unsa nga pagsaad gawas kon pagatumanon Niya kini. Kinahanglan gayud Niya nga buhaton kana aron nga mamahimong Dios. Milabay ang daghang katuigan, sa diha nga kining mao ra nga mga tawo, ang gisaaran nga katawhan, ang mga kaliwat ni Abraham nga atua kaniadto sa ilang panaw, paingon sa—sa yutang gisaad, adunay nagababag nga ganghaan didto, ug nagabatok kaniya, ug kaugalingon niya kadto nga igsoong lalaki, nga si Moab, nga

miingon, “Dili kamo makaagi sa akong yuta. Siguraduhon gayud nako nga dili kamo makaagi sa akong yuta.”

<sup>20</sup> Miingon siya, “Kon ang among mga baka magasabsab sa unsa mang tanum o kon magainom ang mga niini sa imong tubig sa bisan asa, bayaran ka namo tungod niini.”

Apan siya miingon, “Basta dili kamo makaagi niining yutaa.”

<sup>21</sup> Apan nagpabilin nga tinuod gayud ang saad sa Dios. Busa miadto sila ug gikuha ang ilang propeta, nga si Balaam, ug gidala siya didto aron sa pagtunglo sa maong katawhan. Ug ania ang iyang giingon. Gipaningkamotan nila nga ipakita kaniya ang pinakadautan nga bahin sa maong gipanalanginan nga kaliwat, apan gipakita kaniya sa Dios ang pinakamaayo nga bahin niini. Miingon Siya, “Ang si kinsa nga nagatunglo sa Israel pagatungluhon, ug ang si kinsa nga nagapanalangin kaniya pagapanalanginan.” Ug nangalumpag ang mga babag ug gitabok sa Israel ang mga kapatagan. Nagsaad ang Dios nga pagapanag-iyahon sa Israel ang ganghaan sa iyang kaaway.

<sup>22</sup> Unya, sa pila ka mga katuigan, adunay usa nga miabot nga gihinganla’g Daniel, nga anaa sa linya sa niining matinuuron nga Kaliwat, ug anaa sa linya sa maong mga saad, tungod kay siya Kaliwat ni Abraham. Ug gipili na siya sa Dios sa wala pa ang pagkatukod sa kalibutan, aron nga mamahimong Iyang propeta, ug nagkinabuhi siya nga maisugon ug nagkinabuhi siya nga matinuuron. Ug bisan didto siya sa laing yuta, gituyo niya sa iyang kasingkasing, “Dili ko gayud pagahugawan ang akong kaugalingon uban kanila.” Ingon niana ang tinuod nga Kaliwat ni Abraham; nagapuyo didto sa usa ka yuta nga lahi, nagapuyo taliwala sa mga tawo nga lahi, apan bisan pa niana madasigon gayud sa nianang saad. “Dili ko pagahugawan ang akong kaugalingon uban kanila. Magpabilin ako nga matinud-anon.”

<sup>23</sup> Gisulayan siya sa Dios sama sa gihimo sa Dios ngadto sa iyang amahan, nga si Abraham. Ug ang hari miingon, “Mamahimo Ka nga ingon sa usa kanamo ug magsimba sa paagi nga kami nagasimba, o igatambog ko ikaw ngadto sa usa ka langub nga puno sa gipanggutom nga mga leon.”

<sup>24</sup> Si Daniel, sama sa iyang amahan nga si Abraham, miingon, “Mahimo mo akong itambog ngadto sa langub sa mga leon, apan dili gayud ako moyukbo sa bisan unsa sa imong mga rebulto. Dili ko modawat sa inyong pormal nga relihiyon. Magapabilin ako nga matinud-anon kang Jehovah.”

<sup>25</sup> Ug didto dayon miabot ang panagsangka. Gituman sa hari ang iyang bahad ug iyang gipadakup ang propeta, o gipagapus kini ug gitambog ngadto sa langub sa mga leon. Ug sa diha nga ang mga leon, ang kaaway ni Daniel, mihasmag sa maong propeta, gituman sa Dios ang Iyang saad. Gipanag-iyahon ni Daniel ang ganghaan sa iyang kaaway. Nagpabarug ang Dios og usa ka

Manolunda didto sa atubangan niadtong mga leon, ug gipanag-iya ang maong ganghaan. Ginatuman gayud sa Dios ang Iyang saad. “Manag-iya siya sa ganghaan sa iyang kaaway.” Mao kana ang giingon sa Dios.

<sup>26</sup> Dayon aduna pa’y tulo kaniadto didto nga nagpanaad sa ilang mga kaugalingon nga magmatinuuron gayud sa maong prinsipyo, nga mga tinuod gayud nga Kaliwat ni Abraham, ug mao kadto si Sadrach ug Mesach ug si Abednego, ug nga gisulayan sila. Ug sila miingon, “Kon kamo dili moyukbo pagmadunggan ninyo nga nagatugtug na ang mga alpa, ug nga nagatunog na ang mga trumpeta, kon kamo dili moyukbo sa among relihiyon, ug dili mopahilayo gikan sa mga nianang butang nga inyo—inyong ginabarugan! Ug sayop man kamo, bisan unsaon. Wala ma’y kalainan ang inyong relihiyon sa relihiyon ni kinsa man.” Dili ba madungog man nato kana sa tanang panahon? Apan ang—ang relihiyon ni Jesus Cristo lahi gayud. Lahi gayud ang gahum sa Iyang pagkabanhaw. Lahi kita nga klase sa mga tawo, usa ka talagsaon nga katawhan, usa ka harianong pagka-sacerdote. Ang Dios mismo ang mao’y kalainan.

<sup>27</sup> Apan sa diha nga miingon sila, “Kinahanglan ninyo nga mamahimong usa kanamo.” Okey lang unta kadto kang Sadrach ug Mesach ug Abednego kon gigusto nila nga sila ang mamahimong usa kanila, apan dili gayud sila ang mao’y mamahimong usa sa niadtong mga langyaw. Karon, miingon sila, “Kon dili ninyo buhaton kini, aduna kami og pultahan dinhi ngadto sa hudno, nga puede namong ablihan ug itambog kamo sulod niini, ug manghinaut kamo nga unta nahimo na lang kamo nga usa kanamo.”

<sup>28</sup> Nahinumdom sila sa maong saad. Gipalakaw nila sila didto mismo paingon ngadto sa nagdilaab nga hudno. Ug sa dihang giablihan nila ang pultahan ug gitambog na sila ngadto sa kalayo, ang ilang kaaway nga mao’y unta magapaig kanila, gipanag-iya nila ang mga ganghaan sa maong kaaway. Gipadala sa Dios ang Iyang Anak ngadto niadtong nagadilaab nga kalayo ug gipabugnaw ang mga huyohoy sa hangin, ug nagpakig-istorya Siya uban kanila samtang atua sila sa sulod didto. Nagpabilin gayud nga tinuod ang saad sa Dios. Gipanag-iya nila ang ganghaan sa kaaway. Gisulayan usâ, dayon gipanag-iya nila ang ganghaan sa kaaway.

Dili ba si Jesus man Kadto ang naghimo niining saad? “Kon ikaw magalapas ngadto sa usa niining mga gagmay, mas maayo pa alang kanimo nga usa ka galingan nga bato ang gihigot diha sa imong liog ug kalumsan ikaw diha sa kahiladman sa dagat. Ayaw gayud paglapas ngadto niining mga gagmay nga nagatoo nganhi Kanako. Ug kini nga mga ilhanan maganunot kanila nga nagatoo Kanako.”



29 Naghimo Siya og usa ka kalainan. Gipakita Niya kon kinsa ang mitoo ug kon kinsa ang wala mitoo.

Dinha, sa kanunay, duna gayu'y tulo ka pundok sa mga tawo, kana mao: ang dili-magtotoo, ang nagapato-oo, ug ang magtotoo. Apan aduna gayud og paagi ang Dios sa pagpamatuod kon kinsa ang magtotoo. Ang magtotoo kana maong nagabarug nga lig-on sa kon unsay ginaingon sa Dios nga mao ang Kamatuoran. Oo.

30 Si Elias kaniadto, ang Thisbinhon, sa diha nga miabot na kadto sa pagpakigsangka, nagdahum siya nga siya na lang usa sa maong nasud ang nagkinabuhi sa gihapon para sa Dios. Ug ikiha na siya kaniadto sa hari. Ug ila siyang gilutos. Ug kadtong gamay'ng, pinintalan nga rayna, nga gihinganlan og Jezabel, gihulga siya nga patyon. Ug sa dihang miabot na kadto sa pagpakigsangka, gipanag-iya ni Elias ang mga ganghaan sa iyang kaaway ug napahibalik niya ang tibuok nasud ngadto sa Dios. Nagatuman gayud ang Dios sa Iyang saad.

31 Si Moises kaniadto, ingon nga siya usab anaa sa linya niining harianong Binhi, ang Binhi ni Abraham, nga sa dihang gipadala siya didto sa Egipto, aron sa pagluwas sa mga anak sa Israel; ug ang Dios naghatag kaniya og mga ilhanan ug mga katingalahan aron sa pagbuhay, ug aron hampakon ang yuta, ug aron sa pagpatungha og mga baki, ug mga pulgas, ug kangitngit, ug ulan nga yelo, ug ulan, ug kalayo, ug nagbuhay sa tanan na niini nga mga milagro. Bisan pa niana, sa dihang gipangunahan na niya sila pagawas pinaagi sa kamot ni Jehovah, adunay usa ka higayon nga sa dihang naatubang niya ang ganghaan tali kaniya ug sa gisaad nga yuta. Atua didto ang Dagat nga Mapula, usa ka babag patabok sa dalan. Napalibotan sila sa mga kasundalohan ni Faraon, sa mga bukid, sa mga desyerto, ug sa Dagat nga Mapula. Apan mipadayon sa gihapon si Moises sa unahan, ug gipanag-iya ang ganghaan sa iyang kaaway, ug gitabok ang Dagat nga Mapula, nga may mamala nga tumbanan, ingon nagalakaw lang sa dalan nga abugon. "Manag-iya siya sa ganghaan sa kaaway." Mao kana ang giingon sa Dios, ug mao na kana.

32 Pipila pa lang ka tuig ang milabay sa dihang miabot ang mga pagsulay, ug natay-og gayud ang iglesia, nga daw sa ingon kadali ra kaayo para sa usa ka kongregasyon sa mga tawo nga himoon pag medyo ang usa ka butang wala nagakahitabo sa paagi nga angay kini mahitabo. Sa ingon nianang paagi kini ginabuhay sa Dios. Nagapadangat ang Dios og mga tensyon ngadto sa iglesia, "Ang matag usa ka anak nga nagaduol sa Dios kinahanglan nga masulayan, ug mapamatud-an, ug matestingan." Iyang ginatugot nga hampakon ka og mga sakit. Iyang ginatugot nga moabot kanimo ang mga balatian, aron sulayan ikaw ug aron pamatud-an ka, aron maipasundayag sa kalibutan nga ikaw gayud tinuod nga Kaliwat ni Abraham. Iyang ginatugot kini

pinaagi sa Iyang Kaugalingong pagbulut-an. Iyang ginatugot ang mga hitabong-dautan. Iyang ginatugot nga awayon ka sa imong mga higala. Iyang ginatugot ang tanan niini nga mga butang, ug buy-an ang Yawa, aron tintalon ka. Ug buhaton gayud niya ang tanan gawas sa pagkuha sa imong kinabuhi. Mahimo ka Niyang ibundak diha sa higdaanan sa balatian. Mahimo Niyang buhaton nga awayon ka sa imong mga silingan. Mahimo Niyang buhaton nga awayon ka sa iglesia. Mahimo Niya ang halos bisan unsa, ug kabubut-on kini sa Dios para kaniya nga mahitabo kini. Gitudloan kita nga kini labi pa ka bililhon kay sa bulawan, para kanato.

<sup>33</sup> Unsa man ang mahitungod kang Abraham uban ni Isaac, didto sa bukid, ang usa nga mao'y gihatagan og saad? Ug sa iyang pagkamatinuuron ug sa iyang pagkasayod, ug sa iyang pagtoo kang Jehovah, nga pinaagi niana, ug sa niana lang, nga milantaw ang Dios sa ubos ug miingon, “Ang Iyang Kaliwat manag-iya sa mga ganghaan. Nanumpa Ako sa Akong Kaugalingon nga buhaton Ko kining mga butanga.” Wala’y laing labing daku nga Iyang kapanumpaan, mao nga nanumpa Siya sa Iyang Kaugalingon.

Kung ingon niana, nga Iyang gitugotan nga matestingan si Abraham niadtong kinatapusan nga punto, siguradong Iya usab ikaw ug ako pagatestingan alang nianang kinatapusan nga punto, nianang panahon sa pagdesisyon kon diin ang tanan halayo kanimo. Kinahanglan gayud nga mag-inusara kang nagabarug dinha. [Nagapanuktok si Igsoong Branham sa duha ka higayon diha sa pulpito—Ed.] Alleluyah! Mao kana.

<sup>34</sup> Nag-inusarang nagabarug. Moadto didto ug moingon, “Bisan pa nga Iya akong patyon, sa gihapon ako mosalig Kaniya.” Ingon niana ang Kaliwat ni Abraham. Mao kana ang Usa nga naghatag sa saad. “Bisan unsa pa’y ginasulti sa tanang uban pa kanila, ang ginabuhat sa tanang uban pa kanila; alang kanako ug sa akong panimalay, kami magaalagad sa Dios.” Moingon, “Kung nagaingon man ang uban kanila, ‘Wala ma’y pulos ang maong kasinatian. Usa ra kini ka pundok sa emosyon’; alang kanako ug sa akong panimalay, kami magaalagad sa Dios.”

Ug gusto kong moapil kang Pablo dinhi, ug moingon, “Sa dalan nga gitawag og ‘kulto’ sa ingon ako nagasimba sa Dios sa atong mga ginikanan.”

“Bisan pa mga libakira manimba, bisan pang mga manunuis sila, ug bisan pa sila tanan na nga matang sa mini nga mga propeta ug tanan na lang manulod sa iglesia sa taliwala sa mga tawo, ug diha sa mga kasilinganan ug tanan na; apan alang kanako ug alang sa akong panimalay, kami mangalagad sa Ginoo. Bisan pa kon silang tanan mangundang sa pagtambong, ug bisan pang mamugnaw na ang iglesia, wala na’y pagtagad;

ako ug ang akong panimalay, kami mangalagad sa Ginoo. Bisan pa kon aduna ma'y naiampo ug wala naayo; wala kana'y kalambigitan niini; alang kanako ug sa akong panimalay, kami magaalagad sa Ginoo." Bisan pa sa mga kagul-anan ug sa mga pagsulay.

<sup>35</sup> Ang tawo dili mahimo nga dili-masayup, apan ang Dios dili gayud masayup. Ang tawo, kung hunahunaon mo lang ang tawo, makasayup gayud siya. Tingali dili tinuyo, apan mahimo gayud niya. Gitugot kini sa Dios nga masayup siya aron nga matay-og sa Dios ang imong pagtoo diha sa tawo. Wala nakasandig ang atong pagtoo diha sa kaalam sa tawo, kondili diha sa gahum sa pagkabanhaw ni Jesus Cristo. Dinha ginasalig sa matuod nga Kaliwat ni Abraham ang ilang saad. Tungod kay, mamahimo lamang silang mga Kaliwat ni Abraham kon madawat nila ang Balaang Espiritu. Pagwala'y Balaang Espiritu dili sila Kaliwat ni Abraham. Kanang mao ra nga pagtoo nga atua kang Abraham kaniadto nagaabot sa magtotoo. Bisan unsa pa ma'y mahitabo o kon unsa pa kasukwahi, nagapadayon sa gihapon ang magtotoo.

<sup>36</sup> Ningbalik ang mga tigpaniid ug nanag-ingon, "Oh, kini—binuang lang nga sulayan pa. Dili na kinahanglan nga mopadayon pa, tungod kay sila nga mga tawo didto ingon ka mga higante gayud. Ug aduna sila'y mga banggiitan nga pang-gobyerno, ug sila—aduna sila ug mga bangkaw, ug, aba, kita mora og mga dulon lang pag-itapad kanila."

<sup>37</sup> Wala ko kabalo, apan masaligon akong nagatoo nga si Josue kaniadto usa ka gamay lang nga ihid, usa ra ka gamay, gamay nga tawo. Makita ko siya nga dalidaling mipatong, ibabaw—ibabaw sa kung unsa nga matang sa kahon, ug miingon, "Mga katawhan ug kaigsoonan," ngadto sa duha ka milyon nga mga tawo, "labi pang may kasarang kita nga kuhaon kini." Kita n'yo? Ngano man? Ingon-ana ang Kaliwat ni Abraham. Dios man ang naghatag sa maong saad. Ila kadtong kayutaan. Dios ang naghatag sa maong saad. Wala'y sapayan kon unsa man ang mga babag, miingon ang matuod nga Kaliwat ni Abraham, "Maangkon nato kini kay gihatag na kini sa Dios kanato."

<sup>38</sup> Dinha kamo nagabarug karong buntaga. [Ginapalampak ni Igsoong Branham ang iyang mga kamot sa makaduha ka higayon—Ed.] Dinha nagabarug ang Iglesia sa buhing Dios. Dili ko igsapayan kung unsa ang ginaingon ni kinsa man, kung unsa ang ginaingon sa doktor, unsa pa man, kung unsa ang ginaingon sa dili-magtotoo, labaw pa kita ngadto sa bisan unsa man nga magaabot. Mga Kaliwat kita ni Abraham, ug manag-iya kita sa ganghaan sa atong kaaway, bisan unsa pa man ang kaaway. Dios ang naghatag sa maong saad. Ila kadto, ila kadtong panag-iya.

<sup>39</sup> Ang pagkaayo imong panag-iya. Ang kaluwasan imong panag-iya. Ang Espiritu Santo imong panag-iya. Ug aduna'y daghan, linibo ka mga magwawali ug uban pa sa ibabaw sa

yuta karon, nga nagaingon, “Dili kana mao.” Apan ang Kaliwat ni Abraham nahibalo nga mao man gayud kini. Misulong sila nga wala’y pagpanuko ug gipanag-iyahon nila ang mga ganghaan sa kaaway. Nag-ingon ang Dios nga pagapanag-iyahon gayud nila. Gitoohan nila kini tungod kay usa kini ka saad. “Ang Iyang Kaliwat manag-iyahon sa ganghaan sa kaaway.” Karon mangagi usab kamo sa mga kagulan, nga pagsulay.

<sup>40</sup> Ug nagbarug didto si Josue, nga matinuuron. Miingon ang maong gamay nga tawo, “Dili ko igsapayan kung unsa na sila kadaku. Dili ko igsapayan kung unsa man nga matang sa bangkaw nga aduna sila, kung unsa kataas ang pagparil sa ilang mga siyudad, ug kung unsa kadagku kini. Ang saad sa ato mao, nga, ‘Ang ganghaan pagapanag-iyahon sa Kaliwat sa mga anak sa Dios,’ ug mangadto kita didto aron maangkon kini. Wala gayud sila’y kasarang kanato.” Oh, ingon niana ang matuod nga Kaliwat.

<sup>41</sup> Daghan kanila nga natawo kaniadto, mga kaliwat sa pisikal, ang nanag-ingon, “Dili nato kini mahimo. Wala na kinahanglana nga paninguhaon pa. Kita n’yo, kulang kita sa kadaghanon. Dali ra kita pildihon; mga yano lang kita.” Bisan unsa pa, dili niya buhaton. . . Nagalantaw lang sila, kita n’yo, ngadto sa kung unsa ang makita sa mata. Ug si Josue nagalantaw ngadto sa kung unsa ang giingon sa Dios.

<sup>42</sup> Ang Kaliwat ni Abraham wala nagatan-aw sa bisan unsang natural nga mga butang. Nagatan-aw sila sa kung unsa ang giingon sa Ginoo. Mao kana ang saad. Unsa kaha kon si Abraham kaniadto mitan-aw ngadto sa natural? Niadtong usa ka babaye nga usa na ka gatus ang panuigon. . . Nubenta, na kini. Ug siya usa na ka gatus. Ug nagpuyo na kini uban kaniya sukad niadtong usa pa kini ka batan-ong babaye, ug usa pa siya ka batan-ong lalaki, ug wala’y anak. Wala siya mitan-aw niadtong mga butanga. Siya miingon nga giisip niya kadtong mga butanga sama sa daw sa dili ingon niadtong, kay milantaw lamang siya ngadto sa kung unsa ang giingon sa Dios. “Pagapanalangin Ko ikaw, Abraham, ug hatagan Ko ikaw og anak pinaagi kang Sarah.” Ug gitoohan niya kini. Wala ka nagalantaw sa mga babag niini. Nagalantaw kita ngadto sa kung unsa ang giingon sa Dios. Giingon kini sa Dios, mao na kana.

<sup>43</sup> Busa dayon sa miadto na siya ngadto sa Jordan, sa dihang nahimo nang hepe-komandante si Josue sa mga kasundalohan, ug miadto sila ngadto sa pinakadaplin sa suba ug nga mahimong malantaw ang atua sa tabok ug makita ang Jericho. Apan, tali kanila, sa dihang gipapangandam na ni Josue ang iyang kasundalohan, may usa ka ganghaan didto. Kadto nga ganghaan gitawag nga Jordan.

Apan ang saad sa Dios kasaligan ngadto sa matag ganghaan. Bisan unsa pa kini nga ganghaan, ang saad sa Dios kasaligan

gayud. “Manag-iya siya sa mga ganghaan sa iyang kaaway.” Mao na kana.

Sa dihang miadto siya ngadto sa Jordan niadtong buntaga, tingali, motoo ako nga ang Yawa adunay unos nga mga panganod nga atua sa tibuok palibot didto, ang daku ug sa una pang lapukon nga tubig nga nagaagas, ginabanlas sa baha ang mga kaumahan. Oh, pagkamasulayon gayud nga higayon! Apan nag-ingon si Josue, “Pangandam kamo, makita ninyo ang Himaya sa Dios.” Ug nanglimpiyo sila sa ilang kaugalingon ug nangandam, nagpangandam bisan ang tanan na kaniadto daw ingon ka sukwahi. Apan Kaliwat kadto ni Abraham, nga gipanumpa sa Dios, “Igahatag Ko kaniya ang ganghaan.” Miabot siya ngadto sa Jordan, iya kadtong ganghaan, ug iya kadtong gipanag-iya.

<sup>44</sup> Usa sa niining mga buntag siguradong magaagi usab ako nianang katapusan nga ganghaan. Siguradong moagi gayud ka sa Jordan, apan pagapanag-iyahon sa Kaliwat ni Abraham ang maong ganghaan. Bisan unsa pa kini, pagapanag-iyahon niya ang ganghaan sa matag kaaway.

<sup>45</sup> Silang tanan bantugan nga mga tawo. Nangamatay sila diha sa pangatungdanan. Apan, sa katapusan, usa niana ka adlaw didto sa Betlehem sa Judea, natawo ang Harianong Binhi. Nga, ang tanang uban pa kanila mao’y mga landong lamang. Natawo ang Harianong Binhi, dili iya sa tawo. Apan gipanganak Siya pinaagi sa usa ka ulay, uban ang Gahum nga anaa sa Iyang mga ugat aron sa pagbuntog sa kamatayon ug sa impiyerno. Nagsaad ang Dios. Dili kini mahimo sa usa ka ordinaryong tawo. Apan kung nagsaad ang Dios, Siya ang mao ra sa gihapon nga Dios pipila ka minutos pa lang, nga uban kang Abraham kaniadto, si Jehovah-Jireh, ang Ginoo nga magatagana og paagi aron nga mapanag-iya ang ganghaan. Unsaon nato pagbuhat niini? Namatay na si Josue. Namatay na si Moises. Ang uban pa kanila nangamatay na. Apan nag-ingon ang Dios, “Manag-iya Siya sa ganghaan sa iyang kaaway.” Unsaon man niya sa pagpanag-iya sa kamatayon? Aduna Siya’y pamaagi sa pagbuhat og mga butang. “Manag-iya Siya sa ganghaan sa iyang kaaway.”

<sup>46</sup> Natawo ang Harianong Binhi. Gitintal Siya sa tanan nang paagi nga sama kanato. Ingon nga kamo kinahanglan tintalon, mao man usab Siya. Gidala Siya sa Yawa sa gilayon, sa diha nga Iyang nadawat ang Balaang Espiritu, didto sa kamingawan sulod sa kuwarenta ka adlaw ug gabii, aron tintalon. Ug sa diha nga nahuman Siya . . . Ug sa Iyang pagkamatay, gipadulot nila ang mga lansang sa Iyang kamot, ug gilud-an diha sa Iyang nawong. Naagian Niya ang tanang balatian. Apan sa ania pa Siya sa yuta, gipamatud-an Niya nga mahimo Niyang buntogon ang balatian. Sa dihang ang inahan sa asawa ni Pedro naghigda na lang tungod sa balatian, tungod sa paralisis, Iyang gihikap ang kamot niini ug gihuwasan kini sa hilanat. Sa diha nga ang

sanlahon misinggit didto sa pultahan, “Mahugaw! Mahugaw! Kung mahimo Mo, makahinlo Ikaw kanako.”

<sup>47</sup> Siya miingon, “Mahimo Ko. Magmahinlo ka.” Iyang gibuntog ug gipanag-iya ang ganghaan nga sangla. Iyang gipanag-iya ang ganghaan nga hilanat.

Gihimo Niya nga ang matag kinaiyahan motuman Kaniya. Siya mao ang Kaliwat ni Abraham, ang Harianong Binhi, ang Usa nga Kaniya gihatag ang saad; Kaniya, kang Abraham ug sa tanang Kaliwatan nga nanagsunod kaniya, hangtud sa Harianong Binhi, ug sa tanan nang Kaliwatan sa sunod Niya. Tinuod ang saad sa Dios. Gibuntog Niya ang mga balatian.

Gibuntog Niya ang mga tentasyon. Sa dihang gilud-an sa kaaway ang Iyang nawong, gihampak ang Iyang apapangig, gitahan Niya ang pikas bahin niini. Sa dihang gibunlot nila ang bungot gikan sa Iyang nawong ug gilud-an Siya, wala gayud Siya nagbalus. Gibuntog Niya ang ganghaan sa panulay ug gipanag-iya kini.

<sup>48</sup> Dayon moingon ka, “Dili ko tugotan niini sa akong pagkamainiton sa ulo.” Ikaw, nga Kaliwat ni Abraham, oo, sir, gibuntog na Niya kini para kanimo.

<sup>49</sup> Sa dihang ginapasuko Siya kaniadto, wala gayud Siya nasuko. Sa dihang gibiyaybiay Siya, nagpakahilum Siya. Sa dihang gitawag Siya nga usa ka yawa, nagpakahilum lamang Siya. Aduna Siya og usa ra ka buluhaton, ug kana mao ang buluhaton sa Amahan, ug Siya nanagpamuhat alang niana. Dayon, sa katapusan, gilansang nila Siya ngadto sa krus. Kinahanglan Siyang atubangon sa kamatayon. Tanan nang uban kanila gibuntog ang mga kadagatan, ug gibuntog nila ang kinaiyahan, ug gibuntog nila ang mga leon, ug gibuntog nila ang kalayo. Gibuntog nila ang tanan nang butang gawas lamang sa kamatayon. Apan ania ang Usa nga nagapitik diha sa Iyang pangisip, sa Iyang mga kaugatan, ug adunay Gahum nga nagapangdaug sa kamatayon. Busa gigunitan nila ang Iyang mga kamot ug gipadupa Siya, ug gilansang Siya ngadto sa krus. Gibunalan nila Siya ug gilatigo nila Siya hangtud nga ang Iyang mga bukog halos mitan-aw na Kaniya. Apan sa dihang nabuhat na nila, ug nahimo na nila ang tanan nga mahimo nilang buhaton, ang kamatayon miabot Kaniya, nga nag-ingon, “Karon kuhaon ko na Ikaw sama sa gibuhat ko kang Josue. Kuhaon ko na Ikaw sama sa gibuhat ko kang Daniel. Ug buhaton ko ang tanan niini, tungod kay patyon ko na Ikaw.”

<sup>50</sup> Ug namatay Siya hangtud nga ang adlaw naulaw sa kaugalingon niini. Namatay Siya hangtud nga ang kinaiyahan naulaw ug mihunong kini sa pagpanglihok. Misalop ang adlaw sa udtong tutok. Dili mogawas ang mga bitoon. Namatay Siya hangtud nga nagkangitngit gayud ang mga elemento nga daw sa dili na nimo makita ang imong kamot sa atubangan mo, sa

udtong tutok. Mahunahuna ko ang kinaiyahan nga miingon, “Tugoti akong mamatay uban Kaniya.”

<sup>51</sup> Igsoon! Niadtong higayona gipadala sa Yawa ang bililhon Niyang kalag ngadto sa wala’y kahiladman nga bung-aw sa impiyerno. Naabli didto ang mga ganghaan, apan migula Siya sa ikatulo nga adlaw, gidaug kini. Amen. “Ang Iyang Kaliwat manag-iy sa ganghaan sa kaaway.” Gidaug ang Kamatayon! Gidaug Niya ang impiyerno. Sa nianang unang buntag sa Pagkabanhaw, gidaug Niya ang lubnganan. Karon nagabarug kita, nga labaw pa ka mga mananaug, pinaagi Kaniya Nga nahigugma kanato.

<sup>52</sup> Sa Adlaw sa Pentecostes Iyang gipadala ang Espiritu Santo, aron sa pagpadayon, pinaagi sa mga Gentil, aron ipagawas sa pagkuha og Binhi sa saad. Aron ihatag ngadto sa mga Gentil, nga mga sinalikway, aron ihatag ngadto kanila ang bautismo sa Espiritu Santo, aron sa pagdala kanila ngadto sa maong Saad. Karon aduna kita’y katungod nga buntogon ang tanang mga balatian. Dili na nato kinahanglan pang buntogon kini; nabuntog na kini. Kinahanglan lang nato nga maangkon ang maong saad ug madawat kini. Nabuntog na kini. Nabuntog na ang kamatayon. Nabuntog na ang impiyerno. Nabuntog na ang mga balatian. Nabuntog na ang panulay. Nabuntog na ang tanang mga yawa. Nabuntog na ang impiyerno. Nabuntog na ang kamatayon. Nabuntog na ang lubnganan. Nagabarug kita diha sa ganghaan, nga ginadaug kini, dili na kinahanglan nga pabuthan pa. Gibayaran na kini.

<sup>53</sup> Sa Iyang kaaway, igapanag-iy Niya ang ganghaan sa Iyang kaaway. Unsa ka daghan? Linibolibo. Pagapanag-iyahon Niya ang ganghaan sa Iyang kaaway, ang matag kaaway. Nabanhaw Siya gikan sa mga patay. Gipanag-iy nato kini tungod kay gihatag na Niya kini kanato. Kining tanan usa ka wala’y bayad nga gasa, labaw nianang tanan, ug ang tanang butang nga Iyang gibuhat, ug gibuntog ang matag ganghaan. Gibuntog Niya ang balatian, gipanag-iy ang ganghaan. Ang bugtong butang nga kinahanglan natong pagabuhaton mao ang pag-adto sa maong ganghaan, ingnon, “Sa Ngalan ni Jesus Cristo, nga Mananaug!” Amen.

<sup>54</sup> Sa diha nga panahon nang mamatay, ug ang kamatayon moingon, “Tan-awa ako nga magapahimo kaniya nga isalikway ang iyang relihiyon.”

<sup>55</sup> “Sa Ngalan ni Jesus Cristo nga Nazaretnon, pahawa, Jordan!” Ginapanag-iy sa Kaliwat ni Abraham ang maong ganghaan.

<sup>56</sup> Aba, miingon si Pablo, sa diha nga putlon na nila ang iyang ulo, nga usa ka Kaliwat ni Abraham, miingon siya, “Kamatayon, hain na man ang imong ikot? Lubnganan, hain na ang imong

pagkamadaugon? Salamat sa Dios Nga nagahatag kanato sa kadaugan pinaagi ni Jesus Cristo.”

<sup>57</sup> Manag-iya siya sa ganghaan sa iyang kaaway, daugon niya kini. Karon, dili siya ang ginadaug diha sa ganghaan. Iya kining buntogon ug daugon. Pagapanag-iyahon niya kini. Anaa na kana sa kaugalingon niyang Gahum.

<sup>58</sup> Sa Iglesia sa buhing Dios, niining buntaga, napahiluna ang Gahum sa pag-ayo sa tanang mga sakit. Sa Iglesia sa buhing Dios napahiluna ang Gahum sa pagdaug sa tanang mga panulay. Diha sa Iglesia sa buhing Dios, niining buntaga, napahiluna ang Gahum sa paggapus sa sala ug sa pagsalibay niini, ug sa pagdawat sa bautismo sa Espiritu Santo, sulod sa Iglesia ni Jesus Cristo.

“Unsa ma’y inyong ginatinguha, pangayo pinaagi sa Akong Ngalan, ug igahatag kini kaninyo. Sa usa ka diriyyut nga panahon, ug ang kalibutan (dili ang Kaliwatan, kondili ang dautan nga mga kaliwat) dili na makakita Kanako. Apan kamo makakita ra Kanako, kay Ako magauban man kaninyo, bisan sa sulod ninyo, ngadto sa katapusan sa kalibutan.” Ang unsa? Ang Harianong Binhi. “Ang mga buhat nga Akong ginabuhat, buhaton usab ninyo. Ako magpamatuod Mismo nga Ako uban kaninyo, kay kini nga mga ilhanan maganunot kanila nga nagatoo.”

Manag-iya siya sa kaliwat sa iyang kaaway. Manag-iya gayud siya. Ang Iyang Kaliwat magapanag-iya sa ganghaan sa iyang kaaway, bisan unsa pa nga ganghaan. Kung kini balatian, mga panulay, kasal-anan, bisan unsa pa kini nga ganghaan, nabuntog na kini. Ug ginapanag-iya kini sa Kaliwat ni Abraham.

<sup>59</sup> Wala ba mo malipay, karong buntaga, sa pagkasayod nga kita nagabarug karon nga labaw pa ka mananaug, labaw pa ka mananaug? Oh, wala na gayu’y pagpakig-awayan pa. Tapos na ang pagpakig-away. Napatunog na ang pito. Napakayab na ang bandila. Ug sa taliwala sa matag nagtipun-og nga sala, sa taliwala sa matag lawak nga may nagmasakiton, aduna ang kaaran og malig-on nga krus, nga gipahimutang pinaagi sa Dugo ni Jesus Cristo, nga usa ka Mananaug. Ang bugtong butang lamang nga atong buhaton mao ang pag-too niini, paglantaw ug pagkinabuhi.

“Ako magauban kaninyo. Pagapamatud-an Ko. Mangduol ang mga tawo sa kaulahiing mga adlaw, ug mag-ingon, ‘Oh, bueno, sa *kaniadto* pa man kana.’ Apan Ako magauban gayud kaninyo. Ug ang mga butang nga Akong gibuhat, dinhi sa yuta, magauban Ako sa sulod ninyo, nga ginabuhat ang mao rang butang. Dayon sila mahibalo. Sila makakita Kanako. Ang. . . Ang Akong mga katawhan makakita Kanako. Ang Binhi ni Abraham makakita Kanako. Makaila sila Kanako. Mailhan



nila Ako. Ang uban magatawag Kanako nga, ‘Beelzebub,’ sama sa ilang gibuhat kaniadto. Apan makaila kamo Kanako, kay Ako magauban man kaninyo. Kamo makakita Kanako, makita mismo sa inyong mata. Kamo makakita Kanako, kay Ako magauban man kaninyo, bisan hangtud sa katapusan sa kalibutan, nga ginapamuhat ang mao ra mismong mga butang. Ang nagatoo Kanako, ang mga buhat nga Akong ginabuhat iya usab pagabuhaton, ang mao ra nga matang sa mga buhat.”

<sup>60</sup> Ug, sa karon, ang Iglesia sa buhi nga Dios adunay pribilihiyo nga makabarug ug makita ang nagapangdaug, nabanhaw nga si Jesus Cristo, nga Anak sa buhi nga Dios, nga ania karon, nagapuyo sulod sa Iyang Iglesia, nga ginabuhat ang mao rang butang nga Iyang ginabuhat kaniadto. Kung ingon-ana atong mapanag-ya ang ganghaan sa matag kaaway.

<sup>61</sup> Kung aduna ka’y kaaway karong buntaga, nan, igsoon ko, aduna lamang. . . Kung ikaw usa ka Binhi ni Abraham, human nga madungog mo kini, wala’y igong mga yawa sa impiyerno nga makapasirado nianang ganghaan sa atubangan kanimo. Moabli gayud kini. Dili ko igsapayan kon unsa man kini. Adtoi kini didto, ingon nga usa ka gisaaran nga Binhi, nga moingon, “Ginaangkon ko kini. Akoa kini, tungod kay nanumpa ang Dios nga Iyang pagabanhawon si Jesus, ug, pinaagi ni Jesus, pagabuntogon ko kini. Nagaanhi ako sa Ngalan nianang Magdadaug, nga si Jesus Cristo. Pahawa. Kay moagi ako.” Amen. “Manag-ya Siya sa ganghaan sa kaaway.” Kung ingon-ana magbarug ka dinha, uban sa pinatuy-od mo nga abaga ug sa imong nagasidlak nga taming, nga tinabonan sa Dugo ni Ginoong Jesus. Pagailhon kini sa kaaway.

<sup>62</sup> Aduna kamo’y panginahanglanon. Pagpakigsulti Kaniya karon samtang magampo kita, kamo nga ania dinhi, niining buntaga, samtang inyong giduko ang inyong mga ulo. Ug kon aduna kamo og panginahanglan, mahimo ba ninyong ipataas ang inyong kamot ngadto kang Jesus? Ug isulti lamang kini sa inyong kasingkasing, sulod sa inyong kasingkasing, ug moingon, “Ginoo, nahibalo Ikaw sa akong panginahanglan. Karon, akong napatalinghugan, niining buntaga, ug mao kana ang Biblia, ‘Manag-ya Siya sa ganghaan sa kaaway.’ Nagaduol ako aron manag-ya sa ganghaan. Tingali aduna ako’y pagkamainiton sa ulo. Tingali gikinahanglan ko ang Balaang Espiritu. Nagapos ako sa sala. Aduna ko’y panginahanglan. Apan nagaduol ako sa ganghaan karon. Pagaangkonon ko kini, karong buntaga, ang akong ganghaan. Busa, pahawa, moagi na ako.”

<sup>63</sup> Mapanalanginong Ginoo, nakita Mo kining tanan nga mga kamot. Ug nahibalo Ikaw nga Imo kining Pulong, Ginoo. Kinutlo ko lamang Kini, ug gipahayag pinaagi sa mga Kasulatan. Ang mga tawo diha sa Biblia, kung unsa nga ilang gipangdaug ang mga gingharian ug namuhat og mga pagkamatarung, ug nagpalong sa kalayo, sa mabangis nga kalayo, ug nakalikay

sa sulab sa espada, ug nakapatak-up sa baba sa mga leon, ug, oh, labaw pa niini, ang mga babaye nanagdawat sa ilang mga minatay pinaagi sa pagkabanhaw, ug daghan pa nga mga butang, tungod kay gisaad Mo man kini. Imo kining saad, “Ang Iyang Binhi.” “Ang Imong Binhi, nga iya ni Abraham, manag-iya sa ganghaan sa kaaway.” Ug ginatuman Mo gayud ang Imong saad.

<sup>64</sup> Karon ihatag ngadto kanila, Ginoo, ang tinguha sa ilang kasingkasing. Hinaut nga manglakaw sila gikan dinhi nga usa ka lahi na nga mga tawo. Hinaut nga manglakaw sila, nga nahibalo sila—nga mga mananaug sila, tungod nga ang Harianong Binhi nagbuntog man alang kanila. Ang Harianong Hari, sa diha nga mianhi Siya, nga natawo sa usa ka ulay, gibuntog Niya ang matag kaaway, bisan ngadto sa kamatayon. Busa ang kamatayon mismo dili mahimong hadlokon ang Binhi ni Abraham. Aduna kanamo ang saad nga among mapanunod ang kalibutan, ug nga magabalik pag-usab diha sa usa ka mahimayaong paagi, sa usa ka gihimayang lawas, human nga ang ulahing kaaway napahimutang na ilalum sa tilan, sa bugtong ug ulahing anak sa Dios nga magasulod diha sa Gingharian.

<sup>65</sup> Kon aduna man sa nianang nagapataas sa ilang mga kamot, Ginoo, nga mga makasasala, luwasa sila. Kadtong mga backslider, pahibaloa sila nga dili nila kinahanglan nga magpabiling mga backslider. Mahimo niyang panag-iyahon ang maong ganghaan sa pagka-backslide. Tingali kanang usa nga may pagkamainiton sa ulo, usa—usa ka malaw-ay, mahugaw nga dila, o usa ka maulagon nga kasingkasing, o ang usa ka hakog, sa kuwarta, o—o sa pipila ka mahugaw’ng butang, pahibaloa sila nga mahimo nilang mapanag-iya kana nga mga ganghaan. Tingali og balatian kini, Ginoo, mga kasakitan. Mahimo nilang mapanag-iya kana nga ganghaan, “Kay Siya gisamaran tungod sa among mga kalapasan, napangos tungod sa among kasalanan. Ang silot sa among pakigdait diha sa ibabaw Niya, ug pinaagi sa Iyang mga labod kami nangaayo.” Mga mananaug kami, karong buntaga. Itugot kini, Ginoo.

Ug wala’y labot pa nianang tanan, kanang daku nga buhat nga gihimo Niya, anaa sa gihapon Siya uban kanamo. Bisan pa, Siya nagsaad man nga Iya kining pagabuhaton. “Sa hamubo na lang nga panahon ug unya ang kalibutan dili na makakita Kanako, apan kamo makakita ra unya Kanako; tungod kay Ako magauban man kaninyo, bisan sa sulod ninyo, hangtud sa katapusan sa kapanahonan.” Nagaampo ako, Amahan, nga igapadayag Mo ang Imong Kaugalingon nganha sa matag usa, karong buntaga. Kay amo kining ginapangamuyo sa Ngalan ni Jesus. Amen.

<sup>66</sup> Nagatoo ba kamo nga kana mao ang Kamatuoran? [Nagaingon ang kongregasyon, “Amen.”—Ed.] Toohi kini nga may pagkasinsero nga mao gayud ang Kamatuoran, nga wala’y

ni usa ka pagduhaduha sulod sa inyong kasingkasing. Karon hinumdumi lamang kini. Ang pagpamuhat sa Balaang Espiritu yano ra kaayo nga nagapalibog kini sa intelektuwal nga panghunahuna. Ang pinakayanong mga butang nga akong... Nakita ko ang Balaang Espiritu nga mao'y nagbuhat niini. Akong masulti ang mga butang nga, aba, dili ko gani kini mahunahuna sa ingon niana nga paagi. Kon gamiton ko gayud ang kaugalingon kong panghunahuna, moingon ako, "Bueno, mahimong dili husto kana." Apan kanunay kini mao'y husto. Yano lang kaayo ang pagbuhat Niya sa mga butang. Ug nagapamuhat Siya sa mga butang aron nga mapadayag Niya ang Iyang Kaugalingon ngadto sa Iyang mga katawhan. Ang Dios anaa uban sa Iyang mga katawhan. Siya anaa gayud sa taliwala sa Iyang mga katawhan. Gihigugma Niya sila. Ug buut Niya nga magpamuhat para kanila, ug magtabang kanila; ug ipahibalo lang kanila, dili sa kung unsa'y Iya pa lang *pagabuhaton*, kondili sa kung unsa ang Iya nang gibuhat. Gibuhat na Niya kini. Imoha na kini. Sa imo na kini. Usa kini ka wala'y bayad nga gasa gikan sa Dios nga mao'y atong Amahan, para sa Iyang Iglesia.

<sup>67</sup> Karon daw sa unsa nga ang intelektuwal nga panghunahuna magkabalit-ad gayud, sama sa mga adlaw ni Daniel, ug sa mga adlaw sa mga anak nga Hebreohanon, ug—ug sa daghan pa nga atong nahisgotan niining buntaga. Kita n'yo, ang bantugan og intelektuwal nga kalibutan niadtong adlaw ingon gayud ka malisud daugon sama sa unsa kini sa karon. Kini sa una pa kaaway na, diha pa lang sa ilang mga pamaagi sa pagsabot, ug sa ilang moderno nga siyensiya ug sa ingon-anang mga butang, ingon ka komplikado ug tanan na, para sa mga hunahuna kaniadto, sama sa atong panahon sa karon. Kita n'yo, mao ra kini sa gihapon. Apan aduna gayud kaniadto, sa kanunay, mga nangahas sa pagpabilin ug miingon, "Husto ang Dios. Matuod ang Pulong sa Dios."

<sup>68</sup> Ug, kamo, dili na ninyo kinahanglan pa nga mangbuntog, tungod kay Iya nang gibuntog. Ang bugtong butang nga inyo na lamang pagabuhaton mao ang pag-adto ug pag-angkon, pagbarug diha sa ganghaan, nga nagaingon, "Akô kini. Akoa kini. Gihatag na kini sa Dios kanako, ang akong kaluwasan. Kon gikinahanglan ko ang Balaang Espiritu, gihatag Kini sa Dios kanako. Ang saad alang kanako, alang sa atong mga anak, sa tanan nga atua sa halayo, sa kapid-an nga pagatawgon sa Ginoo." Mao nga nagabarug ako. Basta nga...

<sup>69</sup> Ang akong ministerio, mahitungod niining pagpang-ila ug uban pa, sa dili madugay matapos na kini. Oh, maanaa ra kini sa kanunay. Apan hapit na kini matapos, tungod kay mamahimo na kining mas daku pa. Kita n'yo? Mouswag pa kini; gikan sa paggunit og kamot kaniadto, hangtud sa pagpang-ila, ug karon andam na kini nga mamahimong lahi na usab. Kita n'yo? Makita n'yo kini. Bantayi kini ug mahibaloan n'yo nga matuod kini. Kita

n'yo? Nasayod ako nga Kamatuoran kini. Ug mamahimo kini nga mas daku, mas hataas, og mas maayo. Sigurado gayud. Bueno, nagsaad man Siya niini. Ug kon unsa man ang Iyang ginasaad, Iyang ginabuhat. Dili gayud Siya mahimong mapakyas sa Iyang saad. Ug unsa man kini? Iya kining makanunayong-buhi nga Presensiya nga nagauban kanato, aron nga, mahibalo ka nga Iya nang gipanag-iya ang ganghaan para kanimo.

<sup>70</sup> Siya mao ang Harianong Binhi. Wala'y ni usa nga makapanag-iya nianang mga ganghaan gawas Kaniya. Ang tanang mga sa kaniadto mao'y mga landong lamang sa Iyang pag-abot. Apan sa diha nga Siya miabot na, gitapos niini ang tanang mga pagpakigbugno. Natapos ang pagpakigbugno didto sa Getsemani ug didto sa Kalbaryo. Ug karon nagabarug na lamang kita, ingon nga mga mananaug. Wala na'y mga pagpakigbugno nga pagabuhaton pa. Kita . . . Nahuman na ang mga pagpakigbugno. Napanag-iya na nato kini, ang titulo niini. Ang sinulat nga garantiya sa Dios, nga atong Amahan, Nga mipataas sa Iyang kamot, og miingon, "Ako magapanumpa sa Akong Kaugalingon nga ang Iyang Kaliwat manag-iya sa ganghaan sa kaaway." Mao kana. Nakuha na kini. "Siya gisamaran *gayud* tungod sa atong mga kalapasan. Tungod sa Iyang mga labod kita nangaayo *na*." Gihimo na kini. Buhat kini nga human na. Napanag-iya na nato kini. "Ug ang mga buhat nga Akong ginabuhat, pagabuhaton usab ninyo." Ang Hari ania uban kanato, karong buntaga. Ang Iyang dagkung mga panalangin, ang Balaang Espiritu, nagapanglihok sa ibabaw kanato. Ang mabati kanang mahimayaong pagbati, ang mahibaloan nga kini eksaktong . . . nakalina gayud diha sa Pulong sa Dios. Nagahatag kini kanato og ingon ka talagsaon nga kalipay, ang mahibaloan nga—nga ang Dios atong Amahan.

<sup>71</sup> Karon, nagatoo ko, nga siya—nanghatag ba siya'g mga prayer card niining buntaga? Gisultihan ko na siya, okey, kon wala na'y nahibilin gawas lamang sa mga tawo nga taga-tabernakulo, bueno, ayaw lang usa ipanghatag ang mga prayer card. Apan kon adunay—adunay ingon kadaghan sa napulo, kinse ka mga tawo, o mga ingon-ana, nga mga dumoloong dinha sa mga pultahan, aba, ipanghatag ang mga prayer card, aron nga mapaduol nato sila dinhi ug maiampo sila. Pila man ang mga dumoloong nga ania uban kanato karong buntaga? Ipataas ang inyong kamot. Oh, sus! Sakto gayud. Adunay kinse o baynte kanila. Sige. Ipalinya nato kini nga mga prayer card ug dalhon sila dinhi sa entablado. Kita n'yo, ang hinungdan mao nga gisulti ko ang bahin sa mga tawo sa "tabernakulo", taga-dinhi ra man sila.

<sup>72</sup> Kining pagpang-ila. Hinumdumi, nagahisgot ako niini. Ang maong pagpang-ila hapit na gayud moabot sa katapusan niini. Adunay butang nga mas daku pa kaayo niini ug mas maayo kaayo, nga anaa na nagasingabot. Aduna kaniadto, sa

nahibaloan ko, karon nagalantaw ako sa duha ka igsoong lalaki, nga atua didto uban kanako kagahapon, sa dihang nahitabo kadto, kita n'yo, ug sa miaging adlaw, sa diha nga nahitabo kini. Ug kana'y tulo ka higayon nga sunod-sunod, karon, nga nahitabo kadto, usa ka kompirasyon nga kini karon haduol na mismo, kita n'yo, nga andam nang ipahigayon.

<sup>73</sup> Karon, Ginoo, Ikaw mao ang Dios, ug kami Imong mga sulogoon. Nagapasalamat kami Kanimo alang sa Imong Pulong, alang sa Balaang Espiritu Nga nagpanalangin sa among mga kasingkasing. Ug malipayon kami karon. Nagalingkod kami dinhi, nahibalo nga kami mga mananaug. Napanag-iya na namo ang tanan nga mga ganghaan sa kaaway. Gikahatag na kini nganhi kanamo, ug ania na kanamo ang punoang yawi sa among kamot. Ang Ngalan ni Jesus Cristo nga...mao'y moabli sa matag ganghaan sa kaaway. Kuhaa kini nga yawi, ang yawi sa Ngalan ni Jesus, ug maga-...maabli n'yo ang matag ganghaan sa kaaway nga mao'y naggapos kaninyo aron mapahilayo sa bisan unsa man nga saad.

Ug, Dios, karong buntaga nagaduol kami diha sa Ngalan ni Jesus, uban sa niining yawi, aron ablihan ang mga ganghaan alang sa mga masakiton ug sa mga nanag-antus. Kay nahisulat man kini diha sa—sa Iyang Pulong, “Sa Akong Ngalan pagulaon nila ang mga yawa. Magasulti sila og bag-ong mga sinultihan. Ug kung makakupot sila'g mga bitin, o makainom og bisan unsang butang nga makahilo, dili kini makadaut kanila. Pandungan nila sa ilang mga kamot ang mga masakiton ug mangaayo kini.” Nasayod kami nga matuod kining mga butanga. Ug itugot, niining buntaga, Ginoo, nga silang, mga tawo makakita niana, pinaagi sa kapadayagan sa Pulong nga nahimong unod ug nagapuyo ipon kanamo, nga, “Siya gisamaran tungod sa among mga kalapasan; tungod sa Iyang mga labod kami nangaayo.” Ug hinaut nga dawaton nila kini ug mamaayo na, niining buntaga, gikan sa tanan nilang mga sakit ug mga balatian ug mga problema. Among ginapangamuyo kini sa Ngalan ni Jesus. Amen.

<sup>74</sup> Mahimo mo bang tugtogon, Teddy, ang *Only Believe*, sa malumo ug sa hinay nga paagi, kon mahimo mo.

Ug unsa man? Misugod ka ba gikan sa uno? Numero uno, nga prayer kard. Uno, dos, tres, kuwatro, singko, seis, siete, otso, nuebe, diyes, o unsa man nga anaa diha. Sige. Mahimo mo bang sa hilum nga paagi, kon mahimo kang motindog, moduol *dinhing* dapita.

[Adunay nagaingon, “Pila ka buok ang imong gitawag?”—Ed.] Huh? [Adunay nagaingon, “Mao na na. Mao kana.”] Mga...

Tan-awon nato, numero uno, numero dos. Kinsay aduna og numero uno nga prayer card? [Nagaingon ang usa ka igsoong

lalaki, “Ania kanako.”—Ed.] Oo. Numero dos. Sige, sir. Numero tres, numero kuwatro, numero singko, numero sais, numero siete, numero otso, numero nuebe, numero diyes.

<sup>75</sup> Samtang nga nanagpadulong sila ug nanagpuwesto sa pagtindog, gusto kong ipangutana sa pipila kaninyo. Pila man, aduna ba og pipila ka mga tawo sa tabernakulo dinhi, nga nagmasakiton? Mga tawo sa tabernakulo, ipataas ang inyong kamot. Mga lima. . . upat, lima, unom, pito, walo. Mga walo o siyam ka mga kamot. Aduna ba dinhi sa tabernakulo, nga dili taga dinhi sa tabernakulo, nga mga dumoloong uban kanato, tingali og miabot mo nga human na sa panerbisyo ug wala nakakuha og prayer card? Mahimo bang ipataas ninyo ang inyong kamot? Ang si kinsa man nga nanginahanglan sa Dios, nga wala. . . nga—nga dili pirmi dinhi sa tabernakulo. Si bisan kinsa nga ania dinhi nga dili mga miyembro niini nga tabernakulo, ug—ug nga kamo nagmasakiton ug wala’y prayer card, gusto mong hinumduman diha sa pag-ampo? Mahimo bang ipataas ninyo ang inyong kamot, ang matag usa? Sige. Maayo kana. Sige.

<sup>76</sup> Karon magahangyo ako kon mahimo ninyo nga mamahimong ingon ka matinahuron kutob sa inyong mahimo, bisan sa—sa pipila lang ka minuto, ug pagasugdan nato dihadiha dayon ug magsugod na. Karon atong tan-awon. Pila na lang kabuok ang nahibilin, Igsoong Billy? Sige. Anaa na ba dinha ang adunay numero diyes? Gitawag ko na ang numero uno hangtud sa diyes.

Onse, dose, trese, katorse, kinse, patindoga na sila karon. Kon sila ang numero diyes, onse, dose, trese, katorse, kinse, patindoga na sila. Sige. Uno, dos, tres, kuwatro, singko, sais, siete, otso, nuebe, diyes, onse, dose. Kulang og mga duha pa, gikan sa uno hangtud sa kinse. (. . . ? . . . siete, otso, nuebe, diyes, onse.) Kinse, dise-sais, dise-siete, dise-otso, dise-nuebe, baynte.

<sup>77</sup> Oh, kadali lang. Ako—gisultihan ko na siya nga manghatag lang og mga prayer card ngadto sa mga tawo nga dili taga-tabernakulo. Husto kana. Kita n’yo? Tungod kay, mahitabo kini nga, kita n’yo, tungod sa pagpang-ila. Moingon unya ang mga tawo, “Kining mga tawhana taga dinhi man sa tabernakulo.” Kita n’yo? Akong—ginasultihan ko kamo. Pila ba ang nakaanhi na dinhi. . . ang wala pa makaanhi dinhi sa una? Atong tan-awon ang inyong kamot, wala pa’y usa nga nakatambong sa usa sa akong mga panagtigum sa una. Okey. Sige.

Karon, sige, sa kadali lang karon, Igsoong Teddy.

<sup>78</sup> Tingali isulti ko kini karon, nga, tanan kamo nakadungog na bahin sa mga panagtigum, kon unsang paagi nga nagahitabo kini, bisan pa, kamong nakatambong na, kadtong mga nakaadto na sa maong mga panagtigum? Kita n’yo? Sa dinhi pa ang atong Ginoong Jesus sa yuta, Siya wala nag-angkon nga

usa ka mananambal. Siya mao ang Kaliwat ni Abraham, sa pagkatinuod, ug Siya adunay saad diha Kaniya. Miingon Siya nga wala gayud Siya’y gibuhat og bisan unsa man hangtud nga gipakita sa Amahan diha Kaniya. Husto ba kana? [Nagaingon ang kongregasyon, “Amen.”—Ed.] Ug Siya miingon, “Wala Ako’y arang mabuhat hangtud nga ipakita Kanako sa Amahan kon unsay pagabuhaton.” Ug nakita Niya kini pinaagi sa . . . Dili sa “hangtud nga *isulti* Kanako sa Amahan.” “Hangtud nga *ipakita* Kanako sa Amahan.” San Juan 5:19, “Kon unsa’y Akong makita nga ginabuhat sa Amahan, kana’y pagabuhaton usab sa Anak.”

<sup>79</sup> Karon sa diha nga Siya—miabot Siya, atong nahibaloan, sa sinugdanan sa Iyang ministerio, nga human nga Iyang gikuha ang—ang trono ni David. . . [Blangko nga bahin sa teyp—Ed.] Diha sa espirituhanon nga pagsulti, ang . . .

Sa diha nga ang Balaang Espiritu mikunsad diha Kaniya didto sa pagbautismo, ni Juan, ug nahimo Siya nga dinihogan nga Mesias. Karon, hinumdumi, Siya mao ang Anak sa Dios sa diha nga natawo Siya. Siya mao ang Anak sa Dios nga natawo sa ulay. Apan sa diha nga Siya nahimong Mesias, mao’y sa diha nga ang Balaang Espiritu mikunsad diha Kaniya, tungod kay ang *mesias* nagakahulogan man og “usa ka dinihogan.” Kita n’yo? Ug Siya niadto ang Maong dinihogan sa diha nga ang Balaang Espiritu mikunsad diha Kaniya. Nadungog na ninyo akong nagwali bahin sa *Ang Cordero Ug ang Salampati*. Dayon atong nahibaloan, sa diha nga Siya . . . Human sa kuwarenta ka adlaw nga pagtintal Kaniya, minggula Siya.

<sup>80</sup> Ug giunsa man pagsugod sa Iyang ministerio, ug giunsa man sa pagkatapos niini? Nahibaloan nato nga, sa Iyang ministerio adunay usa ka tawo kaniadto nga ginganlan og Andres, nga miadto ug napalgan niya ang iyang igsoon, nga si Simon, nga usa ka mananagat, ug gidala kini ngadto kang Jesus. Ug si Jesus misulti kaniya, miingon, “Ang imong ngalan mao si Simon. Ang ngalan sa imong amahan mao si Jonas. Sukad karon ikaw pagatawgon na nga *Pedro*, nga nagakahulogan og ‘gamay nga bato.’” Mahinumduman ba ninyo kana? Ug kining tawhana nanghibulong gayud kaayo sa kon unsa ang gisulti ni Jesus ngadto kaniya!

Karon, kinahanglan ba gayud nga buhaton kadto sa maong Mesias? Pila man ang nakahibalo niana, moingon, “Amen.” [Nagaingon ang kongregasyon, “Amen”—Ed.] Gikatakda na Siya nga mamahimong Dios-nga-Propeta. Oo, sir. Miingon si Moises, “Ang Ginoo nga inyong Dios magpatindog og usa ka Propeta nga sama kanako. Mahitabo kini nga ang si kinsa nga dili magpatalinghug niining Propeta pagapoohon gikan sa katawhan.”

<sup>81</sup> Karon, unya sa dihang atong nahibaloan, wala magdugay, ang Iyang . . . “Sa mga Iya mianhi Siya.” Kinsa man kadto? Ang

mga Judio, sa kinaiya. “Ug sa ingon ang mga Iya wala modawat Kaniya,” busa Siya kung ingon-ana . . . Karon kinahanglan niini nga mopaingon sa mga Gentil, kita n’yo, tungod kay ang mga Iya wala modawat Kaniya. “Apan ang tanan nga midawat Kaniya, kanila naghatag Siya og kagahum sa pagkahimong mga anak sa Dios.” Busa karon Siya miadto sa mga Gentil, ug dugay na, sa duha na ka libo ka tuig. Apan karon himatikdi ang mga butang nga gibuhat Niya.

<sup>82</sup> Dayon si Felipe, human nga nakita niya nga nahitabo kini, giadtoan niya ug hingkaplagan si Natanael, ug gisultihan si Natanael kon si kinsa ang hingkaplagan niya ug kung unsay gipanghimo Niini. Ug kadto nakapahibulong kang Natanael. Dili gayud siya halos makatoo niini. Apan sa diha nga anaa na siya sa Presensiya ni Ginoong Jesus, sa dihang nakaplagan niya kon hain Siya niadtong tungora, miduol siya ngadto sa Iyang Presensiya, miingon si Jesus, “Tan-awa ang Israelihanon nga kaniya wala’y limbong.”

<sup>83</sup> Karon, kung ikaw kaha kadto ang atua didto, sa imong tan-aw may igo ka na bang pagka-espirituhanon nga maila kung Kinsa kadto? Sa hunahuna mo kaha mahimo mo kadto? Karon himatikdi. Kita n’yo? Kadto nga Tawo, nga usa lamang ka Langyaw, og usa ka mana- . . . didto, tingali og usa Siya ka mananagat. Usa Siya ka panday, mao’y kon unsa Siya kaniadto. Kadto nga Tawong panday nga atua didto, hamtong nga Tawo. Ug ania miabot kini nga lalaki. Mitan-aw Siya kaniya, sama sa usa sa niadtong mga lalaki didto, miingon, “Tan-awa ang Israelihanon nga kaniya wala’y limbong.” Bueno, giunsa man Niya sa pagpakahibalo nga siya usa ka Israelihanon? Dili tungod sa iyang pamisti, kay silang tanan nanagbisti man nga managsama lang. “Nga kaniya wala’y limbong.” Giunsa man Niya pagkahibalo nga siya usa—usa ka wala gayu’y limbong nga tawo?

<sup>84</sup> Busa nagpahibulong kadto sa maong tawo. Ingon nga usa ka tinuod nga magtotoo, siya miingon, “Rabbi,” o igsoon, magwawali, magtutudlo, “kanus-a Mo man ako hingkit-an?” Kita n’yo, nangutana gayud siya Kaniya.

<sup>85</sup> Miingon Siya, “Sa wala ka pa tawga ni Felipe, sa didto ka pa ilalum sa kahoy, nakita Ko na ikaw.”

Miingon siya, “Ikaw mao ang Anak sa Dios. Ikaw mao ang Hari sa Israel.”

<sup>86</sup> Si Jesus miingon, “Tungod ba nga gisulti Ko kini kanimo, karon mitoo ka Kanako? Karon makakita ka og labi pang dagku nga mga butang kay sa niini.”

<sup>87</sup> Ug mao kana’y hinungdan nga nagatoo ako nga ang Iglesia sa buhi nga Dios makakita gayud og labi pang daku nga butang kay sa niini. Andam na kini nga mahitabo karon, sa dili madugay, kita n’yo, tungod kay mitoo man sila niini. Kadtong



mga mingsalikway niini, tungod sa denominasyonhon nga mga babag, duda gayud ko kon motoo ba sila sa bisan unsa. Kita n'yo? Sa ingon-anang mga butang. . . Mahimong magalakaw ka diha sa Kahayag o mamahimo kang buta. Nagapabuta ang Kahayag, o naga-iwag sa dalan.

<sup>88</sup> Nakaplagan ko, ang gagmay'ng mga langgam, didto sa Statue of Liberty. Siguradoha nga makita mo kana, Igsoong Thoms, pagmosaka ka didto, og tan-awa. Ginabunggo nila ang ilang mga ulo hangtud mamatay, didto. Ug miingon ko, "Unsa ma'y nahitabo?"

<sup>89</sup> Miingon, "Imbes nga mosunod sa kahayag, sa panahon nga may unos, aron nga mahilwas, naningkamot sila nga bunggoon aron mamatay ang kahayag. Ilang ginapatay ang ilang kaugalingon."

<sup>90</sup> Mao kana ang bugtong butang nga mahitabo pagginabunggo mo ang Kahayag, ginapatay mo ang imong kaugalingon, sa espirituhanon nga paagi. Paglakaw lamang diha sa Kahayag maingon nga Siya anaa sa Kahayag, dayon may pakig-ambitay kita sa usa'g usa, ang tanang mga iglesia magatoo ug magapadayon ug magakalipay sa maong mga panalangin sa Dios. Dili ba kana pagkamaanindot kaayo?

<sup>91</sup> Tan-awa ninyo ang Samarianhon nga babaye sa diha nga miduol siya. Usa kadto siya ka Samarianhon, karon (dili nga usa ka Judio), usa ka Samarianhon. Ug miingon Siya, "Hatagi Ko og mainum." Ug nagpadayon ang maong pagpakighinabi.

Para kini sa mga bag-ohan karon.

<sup>92</sup> Ug nagpadayon ang maong pagpakighinabi. Karon, wala siya makaila Kaniya ingon nga mao ang Mesias. Siya usa lamang ka—usa ka Tawo, usa ka Judio. Tan-awa ninyo kon giunsa niya pagsulti sa una? Miingon siya, "Aba, dili man kini nabatasan para kaninyo nga mga Judio nga makig-istorya ngadto sa usa ka Samarianhon nga babaye nga sama niini." Miingon siya, "Wala kita'y mga pagpakigharong sa usa'g usa."

<sup>93</sup> Siya miingon, "Apan kung nakaila ka lang kung Kinsa ang nagapakigsulti kanimo, mangayo gayud ka Kanako og mainum. Ug Ako magdala kanimo, hatagan Ko ikaw og tubig nga tungod niini dili ka na kinahanglan moanhi pa aron sa pagkalos"

<sup>94</sup> Aba, miingon siya, "Karon kadali lang." Miingon siya, "Nagasimba kami dinhing bukira, ug—ug kamo nga mga Judio nagasimba didto sa Jerusalem."

<sup>95</sup> Miingon si Jesus, "Apan moabot ang takna nga—nga kamo dili na kinahanglan magasimba bisan didto sa Jerusalem o dinhi niining bukira, apan diha na sa Espiritu. Kay ang Dios Espiritu man, ug ang magasimba Kaniya managsimba Kaniya sa Espiritu ug Kamatuoran." Kita n'yo? Bueno, nagpadayon Siya, nga nakighinabi hangtud nga nasayran Niya kung asa ang

iyang problema. Kung unsa man, nahibalo ba mo asa ang iyang problema? Aduna ba kaninyo ang nasayod kon unsay problema niadtong babaye didto sa atabay? Aduna siya og daghan kaayong mga bana, dili ba? Busa miingon Siya ngadto kaniya, “Lakaw ka kuhaa ang imong bana ug balik dinhi.”

Miingon siya, “Wala ako’y bana.”

<sup>96</sup> Miingon, “Husto kana. Aduna ka’y lima, ug ang usa nga imong gikaipon karon dili man imong bana.”

<sup>97</sup> Miingon siya, “Sir!” Karon himatikdi siya. “Sir, akong naila nga Ikaw usa ka Propeta.”

Kung balikan og tun-an ninyo kanang sinulat dinha sa daplin, mahibaloan ninyo. Ang “Sir,” diha sa orihinal, “Ikaw, akong naila, nga Ikaw mao *kanang* Propeta.” Hinumdumi, diha sa Biblia, kanunay kini nga nagaingon, “Kanang Propeta, Ikaw ba ‘kanang Propeta?’” Kinsa man diay kana nga Propeta? Kadtong Maong gisulti ni Moises nga motungha.

“Akong naila nga Ikaw usa ka Propeta. Karon, gikatudloan kami, ug kami nahibalo nga kung moabot na ang Mesias, Iyang buhaton kining mga butanga.” Mao kadto ang ilhanan sa maong Mesias. Husto ba kana? Nga mahibaloan kon unsay iyang problema. Miingon, “Kami nahibalo nga kung moabot na ang Mesias, Iyang igasulti kanamo kining mga butanga. Apan Kinsa Ka man?”

Siya miingon, “Ako mao Siya, nga nagapakigsulti kanimo.”

<sup>98</sup> Gibiyaan niya ang iyang banga. Siya midalagan ngadto sa siyudad, mapamalandong ko, nga ginagunitan pa niya ang iyang dughan. Ug nagaingon, samtang nagagunit siya sa iyang dughan nga nagalukso-lukso, nga nagaingon, “Umari kamo, tan-awa ang Tawo nga mitug-an kanako sa mga butang nga akong gibuhat. Dili ba kini mao ang mismong Mesias? Dili ba kini ang Maong mismong giingon sa Biblia nga moabot? Usa kini ka Judio nga nagalingkod didto, ordinaryo lamang nga Tawo, nga mora’g usa ka panday. Apan gisultihan Niya ako nga aduna ako’y lima ka bana, ug kamong tanan nasayod gayud nga mao kana ang kamatuoran. Siguradong mao na gayud kini ang Mesias.” Husto ba kana?

<sup>99</sup> Karon, miingon si Jesus, “Diriyut na lang nga panahon, hamubo na lang nga panahon, ang kalibutan dili na makakita Kanako. Apan, kamo makakita ra unya Kanako, tungod kay Ako magauban kaninyo, bisan sa sulod ninyo. Ug ang mga buhat nga Akong ginabuhat inyo usab pagabuhaton. Mas labaw pa kay sa akong ginabuhat dinhi, ang inyong pagabuhaton, kay moadto man Ako sa Amahan, og mobalik diha sa porma sa Espiritu.”

Naibayad na ang halad. Namatay ang Harianong Binhi; nabanhaw na ang Harianon nga Binhi. Karon ang Iglesia nagatindog nga gipakamatarung, pinaagi sa pagtoo niana, ug

makahimo sa pagsulod ang Harianong Binhi sa niini nga mga tawo ug bisan sa paghimo kanila nga mga isigkamanunod, mga anak nga lalaki ug mga anak nga babaye sa Dios.

<sup>100</sup> Karon, sa tanang uban pa kaninyo dinha, nga wala sa niini nga linya sa pagpa-ampo, ako siyang giingnan nga mohatag lang og mga card ngadto sa mga tawo nga... sa diha nga akong gitawag siya niining buntaga. Nagtawag siya kanako, nga miingon, “Gusto mo bang moadto ug manghatag og pipila ka mga card, daddy?”

<sup>101</sup> Miingon ko, “Kung adunay ingon ka daghan sa napulo ka mga tawo nga dili taga dinhi sa tabernakulo.”

<sup>102</sup> Karon, usahay akong matawag ang taga dinhi sa tabernakulo ug mahatagan sila og mga prayer card. Mobalik mo, nga nagaingon, “Bueno, nakaila man siya kanila. Taga dinhi man sila sa tabernakulo. Nasayran na man niya ang ilang kahintang. Sigurado.”

<sup>103</sup> Dayon molingi ako, moingon ko, “Kadto lamang ang dili taga dinhi sa tabernakulo, ang moduol. Sige. Kamo nga dili taga dinhi sa tabernakulo, kamo ang puedeng molinya diha sa linya sa pagpa-ampo.”

<sup>104</sup> “Oh, wala kami makaila kanila,” ang ingnon sa tabernakulo. “Wala gani kami mahibalo sa kon unsay problema nila. Tingali og nagapanghimakak lang siya bahin niini.” Kita n’yo?

<sup>105</sup> Dayon moingon ako, “Wala’y usa nga moduol. Tugotan lang ang Balaang Espiritu nga magapili niadtong mga ania dinhi nga dili taga-tabernakulo, nga nagalingkod dinha.” Sa gihapon, inyo lang. . .

<sup>106</sup> Wala gyu’y paagi, nga mapahiduol ang usa ka tawo ngadto sa Dios, gawas kon siya pinili nang daan nga mamahimong usa ka anak sa Dios. Wala gyu’y paagi nga mahimo kini. Miingon si Jesus, “Wala’y makahimo sa pag-ari Kanako gawas kon siya pagadanihon sa Akong Amahan.” Ug mao kana ang Kamatuoran. Sa tanang butang nga gibuhat Niya, aduna gyu’y butang nga nagasupak. “Kung gibuhat Niya kini sa *niini* nga paagi, kinahanglan unta nga sa ingon niini *kini* nga paagi. Ug *kini* nga paagi, kinahanglan nga mabalik kini sa *niana* nga paagi.” Kita n’yo, kini mao ang dili-pagtoo. Apan ang kaalam ginapakamatarung pinaagi sa mga binuhatan niini. Busa, inyo, makita ninyo.

<sup>107</sup> Karon dinhi, akong ginasulayan nga isulti ngadto—ngadto niining kongregasyon sa katawhan, kini, nga si Jesus Cristo mao kadtong Harianong Binhi. Dili niini nga kita; Siya kini. Mga manununod lamang kita niana, apan atoa na ang tanang mga butang. Unsa kaha kon ikaw ang atua didto niadtong adlaw sa diha nga miadto si Simon? Ug, ikaw, wala’y bisan usa. . . Mao kini ang unang butang nga gibuhat Niya.

<sup>108</sup> Karon, mao kana ang unang butang para sa niini nga mga tawo, kon buhaton Niya kini. Wala gayud nila makita kini kaniadto.

<sup>109</sup> Apan sa diha nga nahiadto na si Simon, usa ka tigulang na nga mananagat, nga wala'y igong edukasyon aron sa pagsulat sa iyang ngalan diha sa usa ka papel. Ang Biblia miingon nga siya kaniadto “wala'y hibangkaagan ug wala'y nakat-onan.” Ang *ug* usa ka sumpay. Parehong, “wala'y hibangkaagan ug wala'y nakat-onan.” Ug dayon sa diha nga miduol Siya didto, may dalang ilhanan, may gahum. . . si Jesus, miingon si Jesus, “Ang imong ngalan mao si Simon.” Unsa ma'y tan-aw n'yo sa kung unsa'y iyang gihunahuna? Unsa kaha'y mahunahunaan ninyo kon kamo ang atua didto? “Ug ang ngalan sa imong amahan mao si Jonas. Ug sukad karon ikaw pagatawgon na nga Pedro.” Aba, unsa kaha'y mahunahunaan ninyo? Nagabasa lang kaha ang maong Tawo sa hunahuna niya? Bueno, unsa kaha'y mahunahunaan ninyo? Mahunahuna kaha ninyo nga mao na kadto ang ilhanan sa Mesias?

<sup>110</sup> Kung mao kana ang ilhanan sa Mesias diha sa usa ka kapanahonan, kinahanglan nga mao kini sa gihapon ang ilhanan sa Mesias, sa ikaduha nga kapanahonan, sa ikatulo nga kapanahonan, sa ikaupat nga kapanahonan. Kinahanglan nga mao ra kini sa gihapon sa matag kapanahonan, tungod kay dili mahimo nga mausab ang Dios. Ug pila man ang nahibalo nga ang Mesias mao ang Dios? Sigurado. Siya mao ang Dinihogan. Sigurado gayud. Mao nga dili Siya mahimong mausab. Kinahanglan gayud nga Siya mao ra sa gihapon.

<sup>111</sup> Mao kana'y hinungdan nga kinahanglan Niyang pamatud-an ang mao ra nga butang ngadto sa mga Samarianhon nga Iya nang gibuhat ngadto sa mga Judio. Tungod kay, ang tulo ka mga nasyonalidad sa mga tawo mao man sila si Ham, si Sem, ug ang mga kaliwat ni Japhet; ang Judio, Gentil, ug ang Samarianhon.

<sup>112</sup> Karon, nahimatikdan ba ninyo ang Espiritu Santo? Pila man ang nahibalo nga si Pedro kaniadto aduna og mga yawi sa Ginghamarian? Inyo bang nahimatikdan? giablihan Niya kini sa Adlaw sa Pentecostes, ngadto sa mga Judio. Miadto didto si Felipe ug nagwali ngadto sa mga Samarianhon, ug nagbautismo kanila sa Ngalan ni Jesus Cristo, apan ang Espiritu Santo wala pa sa gihapon miabot diha kanila. Gikinahanglan nga mapaadtoan nila ug makuha si Pedro, nga mao'y nagpandong sa mga kamot diha kanila ug nadawat nila ang Espiritu Santo. Husto ba kana? [Nagaingon ang kongregasyon, “Amen.”—Ed.] Ug ang panimalay ni Cornelio, ang—ang mga Gentil nakadawat Niini. Mao pa lang kadto. Sukad niadto, abli na kini alang sa tanan. Busa mao kana, kita n'yo, kinahanglan Niyang ablihan kini. Aduna gyu'y mga pamaagi ang Dios sa pagbuhat sa mga butang.

113 Karon, niining buntaga, kung kining Usa Nga naghatag sa maong Saad ngadto sa Binhi, ug kung ang binhi ania dinhi nagalingkod. . . gusto kong toohan nga ang matag usa kaninyo'y binhi. Kung ania ang maong Binhi, sigurado gayud nga ang Binhi makakita sa Saad. Karon, ang matag usa sa niining mga tawo nga nagatindog dinhi nagpataas na sa ilang mga kamot, wala pa gayud sila sukad nakatambong sa mga panagtigum sa una. Mga estranghero sila alang kanako. Wala ako makaila ni usa kanila. Misulod lamang sila dinhi. Ug kaganina, gipanghatagan sila ni Billy og mga prayer card, ug ania sila nga nagatindog dinhi. Aduna pa'y daghan kaninyo dinha, nga nagpataas sa inyong mga kamot, kamo nga mga wala'y prayer card, ug kamo nga mga bag-o pa dinhi. Wala kana og unsa man nga kahilambigitan niini. Toohan lamang ninyo nga kamo mao'y mga manununod nianang saad. Toohan lamang ninyo nga pinaagi sa Iyang mga labod nangaayo kamo. Ug toohan ninyo kana sa tibuok ninyong kasingkasing, ug tan-awa ninyo Siya.

114 Ang butang lang sa niini nga gasa, mao ang pagtugyan lamang sa imong kaugalingon ngadto Kaniya. Wala ako nagasulti og unsa man; Siya ang nagasulti. Ug kung Iyaha Kining Espiritu sa pagpropesiya, ang propeta aduna gayud sa kanunay og MAO KINI ANG GINAINGON SA GINOO. Kanunay gayud Kining husto. Ug dili mo duhaduahan ang Doktrina, tungod kay kinahanglan gayud nga nakalinya kini diha sa Biblia, kon sa Dios man kini. Ang Dios dili mahimong mosulti og usa ka butang, ug dayon balikan kini ug lahion kini. Kinahanglan gayud nga mao ra kini gihapon sa tanang panahon.

115 Karon, kamo nga anaa dinha, toohi ninyo. Uban sa tanan nga anaa diha kaninyo, toohi ninyo. Karon ayaw na kamo paglakaw-lakaw pa. Pabilin lang gayud nga maglingkod karon, ang tanan.

Sa ingon ka mahinay ug malomo nga paagi nga mahimo mo.

Nahitabo lang, niining buntaga, nga ang unang tawo nga nagatindog dinhi mao'y usa ka lalaki. Karon atong pagahisgotan kini nga Kasulatan.

116 Karon makita ba ninyo kung unsay akong kabutang? Pila kaha ang nakasabot niana? Ania ang mga lalaki ug mga babaye nga nagatindog dinhi, nga wala ko pa gayud nakita, sa tibuok kong kinabuhi. Wala pa gyud sila sukad nakatambong sa mga panagtigum, ug makita kung unsay ilang kabutang. Wala sila mahibalo kung unsay mahitabo. Wala ako mahibalo kung unsay mahitabo. Apan gisaad kini sa Dios. Wala gayud si Abraham mahibalo kaniadto kung unsay mahitabo sa dihang gikuha na niya ang punyal aron patyon si Isaac, apan nagsaad na ang Dios kaniya. Mao na kana. Nadawat niya siya kaniadto ingon nga gikan sa usa ka kahimtang nga daw patay na, nga nasayod nga arang Niyang mahimo nga banhawon siya gikan sa mga patay. Husto ba kana? Busa mao na kana.

117 Karon, ania ang usa ka lalaki nga nagatindog tupad kanako, wala ko pa gayud siya makita sukad, wala ako'y hingsayran bahin kaniya. Dili kami managkaila sa usa'g usa. Wala kami makaila sa usa'g usa. Ang Dios ang nakaila kanamong duha.

Karon, pinaagi sa usa ka Balaanong gasa, kung mahimo ko lang pinaagi sa usa ka gikahatag. . . Karon, kana nga mga gasa anaa na diha kaninyo. Gitakda nang daan sa Dios kana sa wala pa matukod ang kalibutan. Pila kaha ang nahibalo niana? [Nagaingon ang kongregasyon, "Amen."—Ed.] Busa dili kini tungod sa bisan unsa man nga nabuhat ko, aron madawat ang maong gasa. Ang Dios ang nagbuut niana. Dili ako ang nagbuut niana. Siya ang nagbuut niana. Kita n'yo? Sama sa mga propeta sa Daang Tugon, ug sa nagkalainlaing mga tawo, pinili nang daan sila aron sa pagbuhay niini, aron buhaton kini.

118 Karon, kung kining lalaki nagmasakiton, dili ako makaayo kaniya. Kung kining lalaki anaa man sa panginahanglan, nagdepende kini sa kon unsay gikinahanglan niya kon makatabang ba ako kaniya o dili. Mahimo ko tingali, kung usa kini ka butang sama sa iyang. . . usa ka gamay'ng butang nga mahimo kong matabangan siya, aba, malipayon gayud ako nga mobuhat niini. Tingali aduna siya og kainit sa ulo. Tingali og dili pa siya usa ka Cristohanon. Tingali og usa na siya ka Cristohanon. Tingali og usa siya ka impostor. Wala ako masayod. Unsa kaha kon siya usa lang ka may dili-maayong tuyo, usa ka basta na lang misulod, ug mitambong dinhi ug magpaaron-aron sa iyang kaugalingon? Bantayi ninyo kon unsay mahitabo, kita n'yo, inyong—tan-awa lang ninyo kung unsay mahitabo. Wala gayud ako masayod.

119 Apan, kita n'yo, nagatindog ka dinhi, kung ingon niana mahimo kang mobarug sa hingpit, sa pagkasayod nga ang Dios nagsaad, nga ang Dios nagatuman sa Iyang saad. Kita n'yo? Karon, kon ginatuman sa Dios ang Iyang saad, taliwala, dinhi mismo karon, sa niini nga mga tawo; pila man kaninyo dinha nga mopabilin sa paglingkod dinha, ug nga sa tibuok ninyong kasingkasing magatoo kamo niini? Nga sa tibuok ninyong kasingkasing, pagatooan ninyo? Kung ingon niana toohan lang ninyo ako.

120 Karon atong tan-awon. Mokuha kita og usa ka Kasulatan. Karon, si Simon Pedro miadto ngadto kang Ginoong Jesus. Ug sa pag-abot niya didto kang Ginoong Jesus, misulti si Ginoong Jesus kaniya kon si kinsa siya, ug—ug misulti kaniya sa mga butang bahin sa iyang kinabuhi. Bueno, ang mao sa gihapon nga Jesus buhi gayud karon. Siya. . . Nagatoo ba kamo nga nabanhaw Siya gikan sa mga patay? [Nagaingon ang kongregasyon, "Amen."—Ed.] Nagatoo ba kamo nga ang pang-Mesias nga Espiritu nagapuyo mismo sulod sa Iglesia, karon, ingon nga mao ra Kini kaniadto sa una pa? ["Amen."] Sige.

<sup>121</sup> Karon, kamo nga mga mananambong, nga wala’y prayer card, pagtan-aw kamo dinhing dapita ug moingon, “Ginoo!” Siyempre, wala gyu’y mga prayer card diha sa mga mananambong, gipatindog ko na silang tanan dinhi. Kamo nga mga mananambong moingon, “Ginoo, hikapa ako.” Tan-awa kon unsay mahitabo. Tan-awa kon unsay mahitabo . . . ? . . .

<sup>122</sup> Karon, sir, kung aduna ma’y paagi sa kalibutan aron matabangan ka, ako gayud kining buhaton. Kita n’yo, ako lamang, dili kita managkaila, ug ako—nahimamat ko ikaw sa pinakauna kong higayon. Apan may katungdanan ako, ingon nga usa ka ministro, sa pagsulti sa Kamatuoran ug mahimong usa ka saksi ni Jesus Cristo. Ug, karon, dili ko gusto nga mosulti ka og unsa man kanako. Gusto ko lang nga tubagon mo ako kon kini kamatuoran ba o dili, ug dayon tugotan Siya nga buhaton kini. Ug kon Siya magapamuhat man sa mao ra nga paagi dinhi sa entablado, pinaagi niini nga lawas, nga Iyang gibuhat kaniadto pinaagi sa lawas ni Jesus!

Kana mao ang Dios, diha kang Cristo. Miingon si Jesus, “Dili Ako magabuhat sa bisan unsa hangtud nga ang Amahan, nga ania Kanako, igapakita Kanako. Nagasulti Siya Kanako sa kon unsay pagabuhaton.” Busa dili kadto si Jesus ang misulti sa maong babaye. Ang Amahan kadto, nga anaa Kaniya, ang misulti sa babaye. Kadto—dili si Jesus ang nakaila kung kinsa si Simon Pedro, kadto mao ang Amahan nga mipuyo diha Kaniya, ang nakaila kung kinsa si Simon Pedro. Mao kana. Kita n’yo? Mao kana.

<sup>123</sup> Masulti ko kanimo, karon, nga usa ikaw ka Cristohanon, oo, sir, tungod kay aduna ikaw og usa—usa—usa ka madinawaton nga espiritu nga mainiton nga nagapitik. Ug, siya, usa siya ka magtotoo. Usa siya ka Cristohanon. Ug nagaantus ikaw sa pagka-nerbiyoso nga mao’y nagahatag kanimo og problema sa tiyan. [Ang igsoong lalaki nagaingon, “Husto kana.”—Ed.] Husto ba kana? [“Husto kana.”] Kita n’yo? Kita n’yo? Karon, eksakto gayud kana. Giunsa man kana? Giunsa ko man pagkahibalo niana? Unsaon ko man sa pagpakahibalo niana? Wala pa namo nahimamat ang usa’g usa kaniadto. Tinuod kana. Dili ba? [“Tinuod kana.”] Tingali magasulti pa Siya kanimo og usa ka butang bahin sa imong kaugalingon. [“Bueno, akong. . .”] Sultihan ko ikaw. Ania ang usa ka butang. Makita ko ang usa ka babaye sa tupad mo. Kauban mo siya. Imo kining asawa. Nanginahanglan pud siya og tabang, usab. [“Husto kana.”] Oo, sir. Motoo ka ba nga mahimong isulti sa Dios dinhi kanako kon unsay problema diha sa imong asawa? [“Nasayod ko nga mahimo Niya.”] Sige, sir. Aduna siya’y sakit sa kasingkasing, mga komplikasyon. [“Oo, sir.”] Husto kana. Dili ba? Pagka-nerbiyoso, usab. [“Husto kana.”] Oo, sir. Karon, dili kamo taga dinhi niining siyudad. [“Dili, sir.”] Mobalik mo *niini* nga dalan pagmanguli na kamo, padulong ngadto sa Cincinnati.

["Husto kana."] Husto kana. Taga-Cincinnati kamo, Ohio. ["Oo, sir."] Ang imong ngalan mao si Milliken. Pauli, panguli na, og mamaayo na. Ang Ginoo magapanalangin kanimo ug mamaayo ka na, ikaw ug ang imong asawa. Panalanginan kamo sa Dios.

Umari ka, sir. Nagatoo ka ba? Magtoo lang gyud. Ayaw gayud pagduhaduha.

<sup>124</sup> Karon magmatinahuron gayud. Magmatinahuron gayud ang tanan karon, pagpabilin nga hilum. Kita n'yo, sensitibo kaayo ang Balaang Espiritu. Pila kaha ang nasayod niana? Sensitibo gayud, ang Balaang Espiritu, kita n'yo, ang unsa mang gamay nga disturbo makapakangang gayud Kaniya.

<sup>125</sup> Sumala sa mga doktor, mamatay ka na gayud, tungod sa sakit sa kasingkasing. [Ang igsoong lalaki nagaingon, "Oo."—Ed.] Husto kana. Mianhi ka dinhi gikan pa sa Chicago, Mr. Mosley. ["Oo."] Theodore ang una sa imong ngalan. ["Oo."] Nagatoo ka ba sa Dios? ["Oo."] Kung ingon-ana pauli na ug mabuhi, sa Ngalan ni Jesus Cristo, ug mamaayo na. Panalanginan ka sa Dios.

<sup>126</sup> Nagatoo ka ba sa Dios? [Ang igsoong babaye nagaingon, "Nagatoo ako. Oo, sir."—Ed.] Nagaantus ka sa kahimtang sa imong batiis. Halayo ka pa gikan dinhi sa lungsod, usab. ["Oo, sir."] Taga-Owensboro ka, Kentucky. Ang imong ngalan mao si Mrs. Lamb. ["Oo, sir."] Pauli na ug mamaayo ka na.

<sup>127</sup> Ang gining nga nagalingkod dinha, taga-Owensboro usab. [Ang igsoong babaye nagaingon, "Amen."—Ed.] Aduna ikaw og hubag diha sa imong suso. Operahan na unta kini, ugma. Lakaw, pagsalig lang, ug mabuhi ka.

<sup>128</sup> Nagatoo ka ba, sir? [Ang igsoong lalaki nagaingon, "Oo, nagatoo ako."—Ed.] Dili gayud kita magkaila sa usa'g usa. ["Oo, dili kita magkaila."] Ang imong ngalan mao si Mr. Gilmore. Husto kana. Gikan pa ka sa Anderson, Indiana, kon diin didto ang dakung buluhaton sa church of God. ["Husto kana."] Husto kana. Nagatindog ka dinhi para sa imong masakiton nga anak nga babaye. May pagkaparalisado siya. Nagatoo ka ba? Nan pauli na ug makaplagan mo siya sa kahimtang nga ginatoohan mo. Sige. Panalanginan ka sa Dios. Magtoo lang. Toohi gayud.

<sup>129</sup> Nagatoo ka ba sa tibuok mong kasingkasing, sir? [Ang igsoong lalaki nagaingon. "Oo, sir."—Ed.] Taga-Indianapolis ka. Usa ikaw ka ministro sa Maayong Balita. Imo kanang asawa. Uh-huh. Nagaantus usab siya. ["Husto kana."] Aduna siya'y problema diha sa tutunlan. Ang doktor... Aduna siya'y sakit sa kasingkasing; gamay'ng pagka-nerbiyoso. Makita ko nga nabungol ang iyang dalunggan. Unsa... Umari ka dinhi.

Ikaw bungol nga espiritu, sa Ngalan ni Jesus Cristo, ginamandoan ko ikaw pinaagi sa buhi nga Dios, gumula ka sa maong babaye.



Karon makadungog ka na kanako og ayo karon. Makapanguli na kamong duha ug mamaayo na. Pauli na mo sa inyong panimalay. Makadungog ka na kanako, ug maayo ka na. Mamaayo ka na gayud.

<sup>130</sup> Nagatoo ba kamo sa tibuok ninyong kasingkasing? [Nagaingon ang kongregasyon, "Amen."—Ed.] Magmaaduna lamang og pagtoo diha sa Dios. Magtoo gayud.

<sup>131</sup> Kanang dugay na nga arthritis ug uban pa mao'y grabe gayud nga butang. Nagatoo ka ba nga ayohon ka sa Dios? Nan lumakaw ka dinha padulong ngadto. Pauli na, nga nagadayeg sa Iyang Ngalan, og nagaingon, "Salamat, minahal nga Ginoong Jesus."

Ang hinungdan nga nahibaloan ko kana sa dali ra kaayo, adunay mao rang kahimtang kining maong babaye, arthritis.

Nogatoo ka ba nga ayohon ka sa Dios? [Ang igsoong lalaki nagaingon, "Oo."—Ed.] Sige, sir. Dayon lakaw ka dinha mismo padulong ngadto, ug moingon, "Salamat, Ginoong Jesus," ug pauli na.

<sup>132</sup> Sige, igsoong babaye, pagtuyok lang ug pauli na, ug magtoo gayud. Ania dinhi, ang panggahi sa imong mga tuhod, ug ang imong sakit sa kasingkasing, ug uban pa. Pagtuyok lang ug pauli na, nga nagaingon, "Salamat, Ginoong Jesus," ug mamaayo ka na. Toohi gayud uban sa tanan nga anaa kanimo.

<sup>133</sup> Nagatoo ba kamo? [Nagaingon ang kongregasyon, "Amen."—Ed.] Kamo usab dinha, ang pipila kaninyo, nagatoo ba kamo? ["Amen."]

<sup>134</sup> Ang makaluluoy'ng gining nga nagalingkod dinha, itum ang buhok, nga may epilepsy, nagatoo ka ba nga ayohon ka sa Dios? Dawaton mo ba kini? Sige. Kung dawaton mo, Iya kining buhaton.

<sup>135</sup> Aniaay usa ka magwawali nga nagalingkod, nagalingkod dinhi, nga gustong mahiduol pa sa Dios. Dili ba, sir? Nagatoo ka ba nga buhaton kini sa Dios para kanimo? Ipataas ang imong kamot ug moingon, "Ako kining dawaton." Uh-huh.

<sup>136</sup> Kining gining nga nagalingkod dinhi, nga mipaubos sa iyang kamot. Aduna siya og problema sa espirituwal nga iyang gihunahuna. Husto kana.

<sup>137</sup> Ania ang usa ka gamay'ng babaye dinhi, nga naghunahuna kon makabaton pa ba siya og usa ka anak. Husto kana. Nakatambong ka na sa usa sa akong mga panagtigum. Nagasaad ako kanimo, pinaagi sa Dios, og usa ka bata. Dili ba? Sige. Nan pauli na ug madawat mo kini. Ayaw na og kabalaka bahin niini.

<sup>138</sup> Nagatoo ba kamo sa tibuok ninyong kasingkasing, ang tanan kaninyo? [Nagaingon ang kongregasyon, "Amen."—Ed.] Nagatoo ba ang matag usa kaninyo? ["Amen."] Ang Binhi ni Abraham manag-iyá sa ganghaan, sa ganghaan nga iya sa kaaway. Mga

Binhi ba mo ni Abraham, pinaagi ni Jesus Cristo? Ipataas ang inyong mga kamot kung mga binhi kamo ni Abraham. ["Amen."]

Kung ingon-niana ipandong ang inyong mga kamot diha ibabaw sa inyong katupad, diha sa inyong katupad, diha sa usa'g usa. Ipandong ang inyong mga kamot diha sa usa'g usa. Panag-iyaha ang maong ganghaan karon. Inyo kini. Panag-iya ninyo kini. "Ang pag-ampo nga inubana'g pagtoo magaluwas kaniya nga nagmasakiton. Pagabangunon sila sa Dios." Sige, pag-ampo kamo sa inyong kinaugalingon nga paagi. Pag-ampo kamo sa paagi nga inyong ginahimo didto sa inyong iglesia. I-ampo ang mga tawo nga anaa uban kaninyo karon. Ipandong ang inyong mga kamot diha sa usa'g usa ug mag-ampo.

<sup>139</sup> Ginoong Jesus, nagaduol kami sa nianang halangdon, Makagagahum nga Ngalan sa Harianong Binhi, ang Binhi ni Abraham, nga nagsaad Kaniya didto sa bukid kon diin Ikaw nagtagana og usa ka carnero; ug gibutang kadtong carnero sa kamingawan, nga usa ka kahibulongang butang, sama sa gibuhat Mo niadtong mga squirrel, kagahapon.

Nagaampo ako, O Ginoong Dios, nga magapadala Ikaw og Gahum, usa ka pagtoo. Ug tugoti nga ang matag Binhi... Nasayod ako nga magatoo sila, Ginoo, tungod kay gisulti Mo, "Ang Binhi ni Abraham." Ug kung aduna ma'y pipila dinhi nga nagpakaaron-ingnon nga Binhi, ug dili Binhi, pasayloa sila sa ilang katuyoan dinhi, o sa ilang pagpaaron-aron. Ug hinaut nga ang Espiritu Santo magpadilaab sa ilang kasingkasing nga may buhing pagtoo. Tugoti nga manglihok ang Espiritu Santo diha sa matag kasingkasing ug ayohon ang tanan nga ania dinhi. Ginapandong nila ang ilang mga kamot diha sa usa'g usa.

Miingon ang Harianong Binhi, "Kini nga mga ilhanan maganunot kanila nga nagatoo. Kon pagapandangan nila sa ilang mga kamot ang mga masakiton, mangaayo kini." Ug ania dinhi karon ang Usa Nga maong nagsaad, nagapasundayag sa Iyang kaugalingon nga ania gayud Siya dinhi. Ania ang Binhi nga nakapandong ang ilang mga kamot diha ibabaw sa usa'g usa. "Kini nga mga ilhanan maganunot kanila nga nagatoo." Hinaut nga ang Balaang Espiritu magakunsad sa matag usa sa ilang mga kamot, pasulod sa mga kasingkasing sa maong mga tawo, pasulod sa mga kalawasan, ug ayohon ang matag usa nga anaa diha sa Balaang Presensiya. Itugot kini, Ginoo.

Akong ginahinginlan ang Yawa. Akong ginahinginlan ang tanang pagkawala'y pagtoo. Akong ginahinginlan ang tanang mahugaw'ng espiritu. Akong ginahinginlan ang tanang mga pagpakaaron-aron. Akong ginahinginlan ang tanang butang nga batok sa Pulong sa Dios. Ug tugotan ang Espiritu Santo nga magapahiluna Siya sulod sa kasingkasing sa mga tawo, karon mismo, pinaagi sa pagtoo. Hinaut nga ang matag sakit ug matag

balatian, ang matag pag-antos mobiya na sa mga tawo, sa Ngalan ni Jesus Cristo. Amen.

<sup>140</sup> Karon, Binhi ni Abraham, kamo nga iya sa harianong kaliwatan, kamo nga anaa sa saad, tungod sa grasya ug tabang sa Dios, pila kaninyo ang mahimong mopataas sa inyong kamot, og moingon, “Nadawat ko na ang akong gipangayo.” Salamat. Mao kana. Mao kana kon para sa asa ang maong saad. Mao kana kon para sa asa gikahatag ang saad, aron nga mamahimo kamong mga manununod sa tanang mga butang, pinaagi ni Jesus Cristo nga nagluwas kaninyo. Siya nagluwas kaninyo gikan sa kasalanan. Siya nagluwas kaninyo gikan sa balatian. Siya nagluwas kaninyo gikan sa kamatayon. Siya nagluwas kaninyo gikan sa impiyerno. Siya nagluwas kaninyo gikan sa lubnganan.

<sup>141</sup> Moingon kamo, “Igsoong Branham, apan kitang tanan mopaingon man ngadto sa lubnganan.” Apan dili makahupot kanato ang lubnganan. Miadto Siya ngadto niini, usab, apan dili gayud kini arang makahupot Kaniya. Dili gayud. Dili kini arang makahupot Kaniya.

<sup>142</sup> “Bueno, Igsoong Branham, matintal man gayud ako.” Gitintal usab Siya, kaniadto. Apan Siya nagluwas na kanimo gikan sa mga panulay.

<sup>143</sup> “Ayaw kami itugyan sa panulay, kondili luwasa kami gikan sa dautan.” Kita n’yo. Gibuhat na Niya kini. Inyoha na kining tanan. Inyoha na ang tanan, pinaagi ni Jesus Cristo. Gihatag na Niya ang tanan nganha kaninyo, nga wala’y bayad. Wala kini og bayad, ni bisan unsa man. Basta sa inyo na kini karon. Dili ba kamo malipay tungod niini? [Nagaingon ang kongregasyon, “Amen.”—Ed.] Dili ba kamo malipay tungod Kaniya? [“Amen.”] Salamat sa Dios.

<sup>144</sup> Karon, adunay mga pagpanerbisyo, karong gabii. Oo. Karong gabii kini, alas siete-traynta karong gabii. Pasultihan ko lang kamo sa pastor. Sige. Sige.

Karon, sa sunod Dominggo sa buntag, kon itugot sa kalooy sa Ginoo, mobalik ako aron maiampo ang mga masakiton, dinhi sa tabernakulo, o kon asa man.



*ANG PAGPANAG-IYA SA MGA GANGHAAN SA KAAWAY* CEB59-1108  
(Possessing The Enemy's Gates)

Kining Mensahe ni Igsoong William Marrion Branham, unang giwali sa Ingles niadtong Dominggo sa buntag, Nobyembre 8, 1959, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga wala'y nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)